

सानसेयारि "बड'सा" ख्रौरालाइयाव  
समाजयारि जिज्जो लोखा थाबाय रायथाय, ब्रन्थाय,  
सल', सल'बाथा आरो दावबायारि थावनि, पार्क  
बाइदिनि स्यायव लिन्नाय लिन्बिदां दैथाय हर/  
सानसेयारि "बड'सा" ख्रौरालाइया खेबखानाने  
फोस्रावगोन।  
बड'सायव लिन्हरनायवि हुबा ख्रालाम,  
"बड'सा" ख्रौ नौथां, जो बयबो आंगो ख्रालाम।  
सानसेयारि बड'सा मावखुलि  
माइबं नोगोर, जोहोलाव दैमालु लामा  
कक्राझार, बिटिसि-783370  
Website: www.bodosanewspaper.com

# सानसेयारि बड'सा



BODOSA ★ A Bodo News Daily ★ Thursday ★ 9 September, 2021 Kokrajhar, BTC, Assam ★ Vol.- 31, Issue No. 165 ★ R.N.I.Regd.No.40994/91, Assam Govt.Regd.No.IPRD.40/2006/13, ★ Rs.8/-

बासुगावआव  
डु भुपेन  
हाज 'रिकानि  
जोनोम सान  
फालिदों

## फैगौ 30 अक्ट'बरसिमाव राइज्योनि साफ्रोमबो सुबुंफोरखौ भेक्सिन थुहोनो देहा बिफानखौ बिथोन होबाय: गिबि मन्थि



बासुगाव, 8 सेप्टेम्बर: भारत  
रत्न, सुधाकन्ट डु भुपेन  
हाज 'रिकानि दिने 95 थि जोनोम  
सानखौ गुबुन गुबुन जायगाजों  
लोगोसे चिरां जिल्लानि  
बासुगाव सहरावबो खुंफुनाय  
जादों। जोनोम साननि हाबाफारि  
बायदियै फुडाव बासुगाव  
गोर्जोसिन गेजेरारि फरायसालिनि  
लांगोनायाव थानाय डु भुपेन  
(□ 5 बिलाइआव)

इन्टार स्टेट बास स्टेन्डआव कभिड भेक्सिन थुगा मिरु आरो गं 15 दावबायगा कभिड भेक्सिन थुगा गारिनि सिबिथाय बेखेवदों

दिसपुर, 8 सेप्टेम्बर: गिबि  
मन्थि डु हिमन्त बिश्व शर्माआ  
दिने बेतकु सियाव थानाय  
इन्टारस्टेट बास थागा  
लांगोनायाव मोनसे कभिड  
भेक्सि थुगा मिरुखौ बेखेवनाने  
होदों। राइज्यो सरकारा बावैसो  
सान सिगां जिल्लायारि हान्था-  
मेला खालामनायखौ  
बेखेवनानि जाहोनाव बे बास  
थागा जायगायाव गोबां  
अन्जिमानि दावबायारिफोरा  
फै नायखौ लानानै  
आथिखालावबो भेक्सिन थुगायै  
जिल्लायारि आरो राइज्योयारि  
दावबायारिफोरखौ कभिडनि  
भेक्सिन होनायनि थांखिजों  
राइज्यो सरकारनि देहा बिफान  
आरो माहारियारि देहा मिसननि



बान्जायनायाव बे मिरुखौ  
बेखेवनाने जादों। फारसेथि  
बेतकुसियाव थानाय इन्टारस्टेट  
बास थागा लांगोनायावबो गिबि  
मन्थि डु हिमन्त बिश्व शर्माआ  
दिने दावबायगा कभिड भेक्सिन  
होगा गारि सिबिथायखौ  
हाबाफारि बायदियै बेखेवनाने  
होदों। बे हाबाफारिनि गिबि  
खोलोबाव दरथाम जिल्ला  
फारियै कक्राझार, बाक्सा आरो  
(□ 5 बिलाइआव)

गं 40 बिसिना गोनां आइ सि इड

लुफुनायनि थाखाय रादाय खालामबाय

दिसपुर, 8 सेप्टेम्बर: लिस्सर देहा पाहामथाय फरायसालिमा  
देहा फेहामसालिआव गं 40 बिसिना गोनां आइ सि इड  
लुफुनाय थाखाय दिने क'ल इण्डिया लिमिटेड आरो रज्यो  
सरकारनि सावसि आरो नखर अन्साय बिफाननि फाहामथाय  
फोरोंथाय बिथोनगिरिख 'नि गेजेराव गिबि मन्थि डु हिमन्त  
बिश्व शर्मानि नुजाथिनायाव मोनसे रादाय खालामबाय।  
जनता भवनाव थानाय गिबि मन्थिनि सावराय न'मायाव  
खुंफुनाय बे गोरोबथानि हाबाफारियाव नुजाथिनाय गिबि  
मन्थि डु शर्माआ चिलसर देहा (□ 5 बिलाइआव)

रन्जन दैमारिखौ जोबथेसालिनिफ्राय उदां खालामनांगौनि दाबिजों  
उदालगुरिआव गेदेरथार सुबुं गौमा हजिखावनाय हाबाफारि

उदालगुरि, 8 सेप्टेम्बर: थानाय  
27 जानुवारीखालि जानानै थानाय  
बर'फोरनि थामथि गोजोन  
गोरोबथा थामहिनबा बि टि आर  
गोरोबथा जानाया से खावसे  
बोसोर सम बारलांसेयावबो  
गोरोबथानि सागानगिरि आरो  
बारग' एन डि एफ बिनि  
गायसनगिरि आफादगिरि रन्जन  
दैमारीजों लोगोसे बि टि आर  
गोरोबथानि दफा बायदियै बारग'  
एन डि एफ बिनि गासै  
सोद्रोमाफोरा दिसेंसिमा  
(□ 5 बिलाइआव)



बुर्लुबुथुर दैमा  
गेजेराव सोमजिनाय  
जाथायखौ मिरुनि  
केबिनेट मन्थि  
सर्वानन्द  
सन 'वालआ दुखु  
मोन्नाय फोरमायदों

गुवाहाटी, 8 सेप्टेम्बर:  
माजुलिनि कमलाबारि आरो  
जरहातनि निमातिघाट फारसें  
थानाय गंनै फेरिनि गेजेराव  
हरखाबै जाबबथाय  
सोमजिनायनि खौरं मोन्नाय  
मिरुनि केबिनेट मन्थि सर्वानन्द  
सन 'वालआ गोथो दुखु मोन्नाय  
फोरमायो। बे आयदाखौ लानानै  
(□ 5 बिलाइआव)

नोगोरमा पुलिस कमिसनार आरो जिल्ला बेंगिरि  
मावखुलिफोरनि गोदानै लुफुंजानो गोनां  
थावनिखौ नायसंहैदों गिबि मन्थि शर्माआ

दिसपुर, 8 सेप्टेम्बर: आसामनि  
गिबि मन्थि डु हिमन्त बिश्व  
शर्माआ दिने गुवाहाटीनि  
खानापारायाव थानाय नोगोरमा  
पुलिस कमिसनारनि मावखुलि  
आरो रुपनगोरवाव थानाय कामरुप  
नोगोरमा जिल्ला कमिसनारनि  
मावखुलिनि गोदानै लुफुंजानो  
गोनां मावखुलिनि थिखानाय  
जायगाफोरखौ नायसंहैदों। बे  
नायसंनय समाव गिबि मन्थिआ  
(□ 5 बिलाइआव)



नाव बेलथायनाय जाथायखौ दुखु  
फोरमायदों राइज्यो बेंगिरिया

गुवाहाटी, 8 सेप्टेम्बर: आसामनि राइज्यो बेंगिरि प्रफेसार जगदिश  
मुखिआ दिने जरहात जिल्लानि निमातिघाटआव नाव बेलथायनाय  
जाथायनि सायाव गोथोवै दुखु मोन्नाय फोरमायदों। दिने गावनि  
दुखु फोरमायनाय रादाबाव राइज्यो बेंगिरिया बुंदोंदि, दिनेनि बे  
नाव बेलथायनाय जाथाय थारोने जोबोद दुखुनांथाव जादों। बे  
जाथायजों गोबां सुबुंफोरनि जिउआ खेफोदाव दं। राइज्यो सरकारा  
सुबुं आरो मुवा-बेसादफोरखौ बोखानो थाखाय गोखोडे बोखानाय  
हाबाफारिखौ जागायदों। जाथायजों भुगिनांनयफोरखौ बोखानायनि  
थाखाय गासै गोनांथि जानाय राहाफोरखौ सरकारनि फारसेनिफ्राय  
लानाय जागोन आरो जोखोम जानाय सुबुंफोरखौ देहा फाहामथाय  
होनायनि सायाव गोखोडे नोजर लाखिनाय जागोन होन्नायै राइज्यो  
बेंगिरि गावनि रादाव बिबुंसारव फोरमायथियो।□

कक्राझार, 8 सेप्टेम्बर:

जिल्लानि सिडव थानाय  
केडिएएस नल्लांआव बि. टि.  
आर. सरकार, क'क्राझार दख'रा  
दुलाराय बर' फरायसा आफाद  
आरो बारग' एन. डि. एफ. बि.  
नि जुथायै बान्जायनायाव 2020  
माइथायाव बर'नि गोजोन  
गोरोबथा एबा बि. टि. आर.  
गोरोबथानि 10.2 द'फायव  
लिन्नाय बायदियै बर'  
लाइमोनफोरखौ सान्थि  
हान्जायाव थिसनथाइ होनायनि  
थाखाय आगु थिसनथाइ



फोरोंथाइ मावबादा बेखेवनाने  
हाबाफारि बान्जायनाय जायो  
आरो बे मेलखौ सामलायदों

ट्राइबेलफोरनि जेंनाफोरखौ सुस्रानायनि  
थाखाय साथाम केबिनेट कमिटी दाफुंगोन

दिसपुर, 8 सेप्टेम्बर: रज्योनि  
ट्राइबेल सुबुंफोरनि गुबुन गुबुन  
जेंनाफोरनि सोमोन्दै  
सावरायलायनायनि थांखिजों  
आसामनि गिबि मन्थि डु  
हिमन्त बिश्व शर्माआ दिने  
ट्राइबेल आफादफोरनि क-  
डिनसन आफादजों गुवाहाटीनि  
कन्याधरायाव थानाय 1 नं  
रज्योयारि आलासि जिगयसालि  
न'मायाव मोनसे सावरायमेल  
खुंफुंलाडो। गासै मोन 24  
ट्राइबेल फरायसा आरो समाजारि  
आफादफोर गे जथुमाव बाहागो  
लादोंमोन। बे जथुमाव बाहागो  
(□ 5 बिलाइआव)



आहपाआव  
देकादं दैसानि हा  
खुरखानायाव  
गोबां नखरनि हा,  
न'-बां खहा

मुसलपुर, 8 सेप्टेम्बर: बाक्सा  
जिल्लानि मुसलपुर महकुमानि  
सिडव थानाय आहपायाव  
देकादं दैसानि हा खुरखानायाव  
गोबां नखरफोरनि न'-बां,  
बारि-बागानफोर बोहेखरजादों।  
आथिखालाय दैसाया जाय  
(□ 5 बिलाइआव)

कक्राझारआव फिजिय' थैरापि क्लिनिक बेखेवदों  
बि टि आरनि मोनफ्रोमबो जिल्लायारि फिजिय'  
थैरापि क्लिनिक बेखेवगोन: अरुप कुमार दे

कक्राझार, 8 सेप्टेम्बर: दिने  
मुलुगनां फिजिय' थैरापि  
सानखौ कक्राझार बिगियान  
फरायसालिमानि बान्जायनायाव  
कक्राझार सहराव फालिनाय  
जायो। दिने बे मुलुगनां फिजिय'  
थैरापि सान फालिनायजों लोब्बा  
लाखिनाने दिने कक्राझारनि  
(□ 5 बिलाइआव)



कक्राझार दख'रा एबसु आरो बारग' एनडिएफबिनि बान्जायनायाव  
सान्थि हान्जायाव थिसननायनि सिगांगो फोरोंथाय माव-बादा खुंदों

कक्राझार, 8 सेप्टेम्बर:  
जिल्लानि सिडव थानाय  
केडिएएस नल्लांआव बि. टि.  
आर. सरकार, क'क्राझार दख'रा  
दुलाराय बर' फरायसा आफाद  
आरो बारग' एन. डि. एफ. बि.  
नि जुथायै बान्जायनायाव 2020  
माइथायाव बर'नि गोजोन  
गोरोबथा एबा बि. टि. आर.  
गोरोबथानि 10.2 द'फायव  
लिन्नाय बायदियै बर'  
लाइमोनफोरखौ सान्थि  
हान्जायाव थिसनथाइ होनायनि  
थाखाय आगु थिसनथाइ



फोरोंथाइ मावबादा बेखेवनाने  
हाबाफारि बान्जायनाय जायो  
आरो बे मेलखौ सामलायदों

क'क्राझार जिल्ला एबसुनि लोगो  
आफादगिरि मुस्ति सोमदोन  
ब्रह्म बिथाड। बे हाबाफारियाव

बाहागो लाफेदों गाहाइ आलासि  
महरै बाहागो लायो सानजा  
क'क्राझार बियाबनि ए. एल.

बि जे पि आसाम प्रदेसनि  
इन-चार्ज आरो जिल्ला  
इन-चार्जफोरनि

फारिलाइखौ फोसावदों  
गुवाहाटी, 8 सेप्टेम्बर: भारतीय  
जनता पार्टी, आसाम प्रदेसनि  
रज्योयारि आफादगिरि भवेस  
कलितारा फौगो समाव दोलोनि  
आफादगिरि बिथाखौ गोखोसिन  
खालामनो दिने बि जे पि  
आसाम प्रदेसनि रज्योयारि  
मर्चाफोरनि बिबानगिरिजों  
लोगोसे जिल्ला इन-चार्ज,  
लोगो इन-चार्जनि फारिलाइखौ  
फोसावना होयो। बेनि सोमोन्दै  
रज्योयारि बि जे पिनि गाहाय  
(□ 5 बिलाइआव)

## सुजुगिरिनि खोलोम आबहावा सैरखाथि आरो बार- दै सोलायनायनि सांग्रांथि

दासांदि मुलुगनाडे आबहावा संरंखाथि लाखिनायनि खोमथा नोजोरगिरि महरै सिनायथि जानो हादों जिड' बोसोर बैसोनि आबहावा मावफारिया ग्रेटा थनबार्ग मुनि हिन्जावसाया। बिथाडा जुथाय हादतनि मावखुलियाव खुं'नाय मेलाव बिबुंथि लाखिनाय सुबुंफोरखौं खावलायहरदों आबहावा लाखिनायनि बागौं। जुथाय हादतनि बार-दै सोलायनायनि सायाव बिबुंथि लाखिनायने बिथाडा सुबुंफोरखौं गोसो गाबखांहोदों। सुइडेननि बि आबहावा मावथि जिड' बोसोर बैसोनि हिन्जावसा ग्रेटा थनबार्गआ जुथाय हादतनि गोजौ थाखोनि बार-दै सोलायनाय जथुम्मायाव जुथाय हादतनि नेहाथारि गाहायखौं लाफानानै मुलुगनि साफ्रोमबो गिदित गिदित दैदेनगिरिफोरखौं थांखिनायने गोसो गाबखांहोदों हानाय बिबुंथि लाखिदों। बिथाडा मुलुगनि दैदेनगिरिफोरखौं थांखिनायने बुंदों- नोंथांमोनहा जोनि गोदें सिमां, जोनि गोलेँ गोसोखौं खंखोला बाथ्राजों थेर बेथेर खालामबाय। नोंथांमोननि गोसोया माबोरें जालांखो। आंहा दिनें खाफाल मोजां। नाथाय सुबुंफोरा सिलिंखार जाबोगासिनो दड, थैगासिनो दड। दिनें मुलुगनाडेनो इक' सिस्टेमया थालांयें जोबसांलांनयनि लामा लागासिनो दड। बिथाडा आथिखालनि हालोदखौं नोजोर होनायने बिबुंथि लाखिनायजों लोगोसेनो गोसो बायगिलनायबो नुनो मोन्दों। बिथाडा लाइमोन सुबुंफोरनि सान्नाय-हनाय मिजिंखौं सिमफायनानै होबाय, लाइमोनफोरनि मेगन नोजोरा बिसोरनि सायावनो जायफोरा इयुनाव फिन खेबसेबाव फोथायखेबस' खालामबावनो लादों आरो बेयो निमाहा होथावन जानाय नडा होनायने सांग्रांथि होदों। आबहावा मावफारिया ग्रेटाआ बुं'बावदों- सुबुं माहारिया दिनें गोमालांनयनि लामायाव, बेराफासैं रांखावरि आरो रांखान्थि फोजौंखानांनयनि नंखाय सान्नाय-हनायखौं लानानै दिनें बाथ्रा बुंनो लादों। दिनें मुलुगया सांग्रां जाबाय आरो बे लामाखौं नागारनायनि सम फैबाय। दिनें मुलुगनि साफ्रोम लाइमोन हान्जायानो रोखायें मिबथिनो मोनबाय- बार-दै सोलायनायखौं होबथानो सुबुंफोरा सिगांनोनांगोन।

## दिनेंनि फानजामुथि

**राशि बाइदियें मुनि गिबि हांखो**  
मेष : अ ल वृष : ऊ ब (उ ए इ) मिथुन : क छ (ड ष) कर्कट : ड ह सिंह : म ट कन्या : प ठ (ण ष) तुला : त र वृश्चिक : ब न धनु : ध भ (ढ फ) मकर : ख ज कुम्भ : ग श (स) मीन : द च (ख ज झ)

- मेष:** दिनेंनि सानआ गोथार सान। जेखि जाया मोजां खामानि मावनो हागोन। गोजोन्नाय मोनगोन।
- वृष:** देहाखौं मोजां मोन्नाय नडा। जानायाव सांग्रां जानांगोन। सावस्त्रिया हानि जानो हागौं।
- मिथुन:** दिनें गोजोन्नाय गैथैजोंनो समखौं हगारनांगोन। जेखि जाया गोसो हमथानांगोन।
- कर्कट:** मोजां सोलोंथाय मोन्नाय दावगालांनो हागोन। फारफ्रोमथिबो मोजां।
- सिंह:** माबा मोनसे मुवा खहा जानो हागौं। गोसोखौं शान्ति मोन्नाय नडा। गोसो हमथा।
- कन्या:** नखरखौं शान्तिथै दालांनो हागोन। फारफ्रोमबो जौगानाय फैनो हागौं। मोजां सान।
- तुला:** सानाय-सुनाय बेराम सिखांनो हागौं। देहाखौं सांग्रांडे लाखि।
- वृश्चिक:** जेखि मावा मानो जौगाखानाय फैगोन। फारफ्रोमथिबो मोजां।
- धनु:** माबा मोनसे धोहनो मोन्नो हागोन। गोसोखौं गोजोन मोनगोन। मोजां सम।
- मकर:** दिनें बेरेखा सम। जेरैथिबो सांग्रां जानानै थानांगोन। जेखि जाय गोसो हमथा।
- कुम्भ:** जेखि जाया लोरबां गोसो लानो नाडा। सानायखौं मावफुडेब्ला जाफुंनो हागौं। मोजां सान।
- मीन:** मानिबा थाखाय सोरजोंबा जगा-जग खालामनांनो हागौं। सान्नाया जाफुंनो।

## गिबि मन्थि स्टालिनआ मिरु सरकारनाव सिएएखौं दोन्थ 'नो आर'ज गाबदों

गोदान दिल्ली, 8 सेप्टेम्बर : तामिलनाडुनि गिबि मन्थि एमके स्टालिनआ राइज्यो बिधान सभाआव थांखि लानायखौं दिन्थिदों। बेवहाय बियो मिरु सरकारनाव नोगोरारि सोदोनाय बिथोनमा (सिएए) खौं दोनथनो आर'ज गाबदों। बिधान सभाआव सिएएनि हेंथायै थांखि लानायनि सायाव स्टालिनआ बुंदों, नोगोरारि सोदोनाय बिथोनमाखौं रिफुजिफोरजों लोगोसे बनि धोरोमारि समायखिर लानाय आरो माहारियाखौं बिथा खालामनायनि सायाव फारगथि दिन्थिनो थाखाय बानायनाय जादोंमोन। बेनि सिगां स्टालिनआ राइज्योयारि बिथिनि हाबाफारि मावनायखौं गावयारि खालामनायखौं लानानै जिंगा सिनायखौं फोरमायदों। मिरुनाव राइज्योआरि बिथिनि हाबाफारि मावनायखौं गावयारि खालामनायनि थांखि लानायनि सायाव फिन सावरायनो आर'ज गाबदों आरो बुंदोंदि, बेयो हादतनि टेक्नलजि आरो गावनि आथिंआव गसंनाय थांखि लानायनि सायाव हाबामावयो। स्टालिनआ बिथान सभाआव बुंदोंमोनदि, बे आयदानि सायाव गाहाय मन्थि नरेन्द्र मदिनो लाइजाम लिरगोन। सरकारि प्रेस बिबुंसारनि बादिब्ला, स्टालिनआ गाहाय मन्थिनो दैथाय हरनाय लाइजामाव बुंदों बेबादि फसंथानफोरखौं गायसननो थाखाय सरकारनि हा सा बाहागोनि अनगायै सुबुंफोरनि हा सा बाहागोखौंनो होनाय जादोंमोन। बेनि थाखायनो सुबुंफोरनाव बेबादि हाबाफारि मावनायनि सायाव मोन्थाय दं। मिरुनि माहारियारि मनिटाइजेसन पाइपलाइन यजनाखौं मख'नानै गिबि मन्थिआ बुंदों बेयो फिसा-फिसौं आरो गेजेर थाखोनि उद्यगआव हाबा मावग्रा सुबुंफोरनि सायाव मा बादि गोहोम गोग्लैगोन बेयो दासिमबो रोखा जायाखै।

## करनाजों जिउ गोमानायखौं मेडिकेलनि सांग्रांथि गैथै होन्नायने गनायजाथाव नडा: सुप्रिम कर्ट



गोदान दिल्ली, 8 सेप्टेम्बर: सुप्रिम कर्टआ बुंदोंदि, कभिड-19 नि नैथि दोहोआव करना सन्देनायफोर फाहामसालिनि सांग्रांथि गैथैनि जाहोनाव जिउ गोमादों होन्नाय बाथ्राखौं बिजिरसालिआ गनायनो हाया। सुप्रिम कर्टआ भुगिनांनय नख'रफोरा फाहामसालिखौं सांग्रांथि गैथै होन्ना बुंनानै अन्सुथायनि दाबि दैखानाय आर'जलाइनि सायाव बिजिरनो नेवसिगारदों। बिजिरगिरि डि वाइ चन्द्रशुड, विक्रम नाथ आरो हेमा कहलीनि पीठआ आर'जलाइ थिसनग्रा दिपक

## करना भेक्सिन स्पुतनिक- भिनि नैथि कम्पनेन्टनि जगायना होनाया जागायबाय

गोदान दिल्ली, 8 सेप्टेम्बर: पेनेसिया बायटेकआ रसियानि स्पुतनिक-भि भेक्सिननि नैथि कम्पनेन्टनि गिबि खेपखौं जगायना होबाय। बे भेक्सिनखौं कम्पनीया भारतआव फाननो थाखाय बानायदों। स्पुतनिक-भि भेक्सिननि मोन्नेबो ड्रुपनि गुनआ आलादा-आलादा, मानोना मोन्नेबो ड्रुपआव आलादा-आलादा तत्वफोर दं। मुलि बानायग्रा कम्पनी पेनेसिया बायटेक आरो रसियानि डायरेक्टर इभेस्टेन्ट फान्ड (आर डि आइ एफ) आ जुथायै फिन होनायाव बुंदोंदि, बेयो भेक्सिननि नैथि कम्पनेन्टनि गिबि खेप। बेखौं कम्पनीयानो दिहुन्दों आरो जगायनानैबो होदों। फिन्नायाव बुं'बावदोंदि, मोन्नेबो ड्रुपनि थाखाय समान एबा एके तन्त्राखौंनो बाहायनाय भेक्सिनफोरजों रुजुनायाव बे भेक्सिनआ गोबावसिन समनि थाखाय इमिजनिटि सोमजिखां होयो। पेनेसिया बायटेकआ समबारनि मोनायाव सेयार

## सुरुपेटानि रामधेनु बिजाब बाखिखौं फिन बेखेवफिन्नायनि थांखि लादों, जिल्ला बेंगिरिनि दैदेनायाव बिजाब बाखिनि लांगोनायाव साखोन-सिखोन हाबाफारि लादों

भवानिपुर, 8 सेप्टेम्बर: 1998 माइथायावनो गायसनजानाय आथिखालाव गोग्लैसोनानै थानाय बजालि जिल्लानि सुरुपेटानि रामधेनु बिजाब बाखियाव दिनें हरखाबे फुं समाव नुजाथि फैदों बजालि जिल्लानि जिल्ला बेंगिरि भरतभुपन देब चौधुरिआ। बिजाब बाखिखौं गाजि गोग्लैसोनाय थासारियाव थानायखौं खौरं मोन्नाय दिनें हरखाब जिल्ला बेंगिरिया फुंनि समाव नुजाथि फैनानै रामधेनु बिजाब बाखि लांगोनायाव साखोन-सिखोन सिबसांनय खामानि मावनायखौं नुनो मोन्दों। जेराव जायगानि खायसे राइज्योफोर, फोरोंगिरि, फरायसाफोरनि नुजाथिफैनायाव जिल्ला बेंगिरि भारत भुपन देब चौधुरिआ गावनो बिजाब बाखि लांगोनायाव साखोन-सिखोन सिबसांनय खामानि याव नांथाबो। लोगोसेनो नुजाथिफैनाय राइज्योफोर, फोरोंगिरिफोरबो बेजों लोगोसे खामानि मावफानायखौं नुनो मोन्दों। बे आयदायावनो जिल्ला



बेंगिरिया बिजाब बाखियाव माखासे बिजाबफोर गथायना होगोन होन्नायनि अनगायैबो इयुन समाव खौरंलाइ, सावराय लाइसि बिजाबफोर बिजाब बाखियाव लाखिनायनि बाथ्राखौंनो बियो हेफाजाब होगोन होन्ना फोसावना होयो। जिल्ला बेंगिरि चौधुरिआ सुलुडव फोरमायना होदोंदि, बिजाब बाखिनि सिडव बिजाब फरायनायनि थासारि सोमजिनांगोन आरो गियान सोरजिनायनि बिथिडाव बे बिजाब बाखिआ जायगायारि दैदेननांगोन। मख'नो गोनांदि, बिजाब बाखिखौं सामलायनायनि थाखाय फरायसाफोरनो बिबान गथायना होयो जिल्ला बेंगिरिया। दिनेंनिक्राय नेम बादिथै रामधेनु बिजाब बाखिनि गुबे खामानिनि फारिलाइया जागायगोन होन्नायनेबो फोसावना होदों जिल्ला बेंगिरिया। जिल्ला बेंगिरि भरत भुपन देब चौधुरिआ दिनें बिजाब बाखिनि बिबानगिरिफोर, राइज्योफोर, फरायसाफोरजों बाथ्रा सावरायलायो। मख'नो गोनांदि, सप्ताह खेबफ्रोमबो सानसे जिल्ला बेंगिरि चौधुरिआ बे बिजाब बाखियाव फरायसाफोरजों बाथ्रा सावरायफैगोन होन्नायनेबो बुंथिना होदों।

## महारास्ट्रयाव गनेश फुजानि पान्डालफोराव सिबियारिफोरनि थानायखौं होबथादों



करना इनफेक्सननि जेनाया गिखंथाव महर लाबोदों। बिएमसिनि मेयर किशर पेडनेकरआ बुंदों मुम्बाइआव करनानि थामथि दोहोआ आगान होबाय। थानाय आगस्ट दाननि जोबथा सप्ताहनिखुइ सेप्टेम्बर दाननि गिबि सप्ताहयाव मुम्बाइनि करना केसआ 18 जौखोन्दो बांसिन जादों। सेप्टेम्बरनि गिबि सप्ताहयाव मुम्बाइआव 2,939 गोदान पजिडिथ केस मोन्दों। सिबियारिफोरनि थानायखौं होबथादों। नागपुरआवबो करनानि जेनाया बांसिन जादों। बेयावबो गलाफोरनि खुलिनय समखौं सोलायनानै खालि बेलासिनि 4 रिंगानिमल खालामनो होदों। मुम्बाइआव मंगलबारनि 349 गोदान करना केस मोनो आरो सा 5 जिउ गोमायो, जायखौं लाफानानै करना पजिडिथनि गासै केसआ 7,46,725 जाहैयो आरो थैनाय अन्जिमाया 15,998 जायो।

मुम्बाइनि मेयरआ बुं'बावोदि गनेश फोर्बोआव सुबुंफोरा बाइजोआव ओंखाराजासे गाव गावनि न'आवनो फोर्बो खुनो बिथोन होनो थांखि लादों आरो मन्डलफोरबो करना प्रटकलखौं फालिनानै गनेश फोर्बोखौं फालिनो खोथा होदों। मोनफ्रोमबो मन्डलआव सा 19 सायख'जानाय सुबुंफोराल' हाबाफारियाव बाहागो लागोन। बिएमसिनि गोदान साकुंलारनि बादिब्ला गनेश पान्डालफोराव सिबियारिफोरा नुजाथिनाया फुरायैनो बन्द थागोन। फुजा खुंथायफोरा अनलाइननि गेजेरजों दर्शन खालामनायनि सुबिधा खालामलांगोन। महारास्ट्रआव थानाय 24 घन्टयाव 3,898 गोदान करना केस मोन्दों आरो सा 86 जिउ गोमादों। बेखौं लाफानानै राइज्योआव गासै 64,93,698 पजिडिथ केस मोन्नाय आरो सा 1,37,877 थैबाय।

## फैगौ 2023 आव जी-20 जथुम्माखौं भारतआ खुंगोन

गोदान दिल्ली, 8 सेप्टेम्बर: मिरुयारि पालांगि आरो उद्यग मन्थि पियुष गयेलखौं मुलुगनि गाहाय रांखान्थि राहाफोरखौं लोगोसे लाबोग्रा आफाद जी-20 नि थाखाय भारतनि शेरपा महरै थिसनो। बेखौं फोसावनानै भारतआ फैगौ 2022 नि 1 डिसेम्बरआव जी 20 हान्जाखौं दैदेनगोन आरो गिबि खेबआव 2023 आव बिसोरनि शिखर सम्मिलनखौं खुंगोन। जी-20 हादरफोरनि फैगौ जथुम्मायाव 30-31 अक्टूबरआव इटलीआ खुंगोन। मख'नो गोनांदि, शेरपाया जी-20 नि सोद्रोमा हादरफोरनि दैदेनगिरिफोरनि तान्दै जायो, जाय शिखर सम्मिलननि एजेन्डाफोरनि गेजेरजों समानथि



बानायो आरो सोद्रोमायारि हादरफोरजों लोगोसे गोरोबलायनानै रांखान्थि, राजखान्थि आरो मुलुगयारि सावरायनयनि एजेन्डाखौं लानानै सावरायो। गाहाय मन्थि नरेन्द्र मदिआ थानाय 2014 निफ्रायनो जी 20 आव भारतनि थान्दै जाबोगासिनो दड। भारतआ थानाय 1999 आव जी-20 खौं दानाय लोगो-लोगो बेनि सोद्रोमा जाबोदों।

# राज्यो कंग्रेसनि आफादगिरि अधीर रन्जन चौधुरीया गिबि मन्थि ममतानि हेंथायै बिजाथि फसंनो फोसावदों

गोदान दिल्ली, 8 सेप्टेम्बर: सोनाब बंगनि उफ्रा बिसायख 'थिखौ लानानै संग्रेसआ बारा गोसो गुदुं जायाखै। पार्टिआ उफ्रा बिसायख 'थिनिफ्राय जानगाराव थानो सानो, नाथाय राइज्यो कंग्रेसनि आफादगिरि अधीर रन्जन चौधुरीया गिबि मन्थि ममता बेनार्जीनि हेंथायै बिजाथि फसंनो फोसावदों पार्टिनि दैदेनगिरिखौ जेंनायाव खोख्लैदों। फार्से'थि पार्टिया तृणमुल कंग्रेसजों सोमोन्दोखौ साबसिन खालामनो नाजादों। कंग्रेसनि सासे गागि दैदेनगिरिया बुंदोंदि, पार्टिया मोनथाम मासिफोरआव उफ्रा बिसायख 'थि बादायनो नाड।



जंगीपुर आरो शमशेरान्जआव बिसायख 'थि बादायनयानि सायाव फिन खनसेबाव सावरायनो हागौ, नाथाय भावानिपुरनिफ्राय ममता बेनार्जीनि हेंथायै पार्टिआ सासेबो

बिजाथिखौ फसंनो नाड। मानोना बेरेखा दोलोनि खौसेथिनि थाखाय तृणमुल कंग्रेसआ गिदिर गोहो। पार्टिनि आफादगिरि शनिया गान्धीया 2020 नि लकसभा बिसायख 'थिखौ थांखि खालामनानै गासैबो दोलोफोरखौ खौसे जानो

खावलायदों। थांनाय 20 आगस्तआव बेरेखा दोलोनि दैदेनगिरिफोरजों जथुमायाव सोमोन्दो लानानै सनिया गान्धीया बुंदोंमोनदि, आथिखालाव बेरेखा दोलोफोरनि खौसेथि जानाया हादतनि हितनि दाबि। बेनि उनाव ममता बेनार्जीनि बेरेखायै

बिसायख 'थि बादायनयानि जेबो ओंथि थाया। पार्टिनि दैदेनगिरिया मानियोदि, अधीर रन्जन चौधुरीया गिबि मन्थिजों गावनि रागा जौलायनयानि जाहोनाव बेबादि खालामनो नाजादों। मानोना थांनाय सानफोराव कंग्रेसनि आफादगिरि सनिया गान्धी आरो राहुल गान्धीजों लोगो हमनायाव ममता बेनार्जीया अधीर रन्जनखौ अजद होदोंमोन। बेनि उनाव बिखौ लकसभायाव पार्टिनि दैदेनगिरि बिबाननिफ्राय बोखलायनयानि बाश्नाबो सावरायनयानि जादोंमोन। सोनाब बंग कंग्रेसनिबो माखासे दैदेनगिरिफोर राइज्यो कंग्रेसनि आफादगिरि अधीर रन्जन चौधुरीनि थांखि लानायखौ गोजोनाय मोनाखै।

# भारत आरो जापानआ बोथोर सोलायनाय आरो ग्रीन हाइड्रजेननि सायाव सावराय लायदों

गोदान दिल्ली, 8 सेप्टेम्बर: मिरु मन्थि भुपेन्द्र यादवआ भारत आरो जापाननि गेजेराव आबहावनि सायाव गिबि गोजौ थाखोनि नेमखान्थि सावरायलायनायआव बुंदों दरनैबो हादतआ सोदांनयानि गोहो, खम कार्बन ओंखारनाय टेकनलजि आरो ग्रीन हाइड्रजेन बायदि बिथिडा हेफाजाब होनायखौ गोखों खालामनयानि जानो हाथावखौ संदानो हागोन। मिरु आबहावा मावख 'निफ्राय फोसावनाय मोनसे बिबुंथिआव बुंदों डिजिटल नेमखान्थिजों खुंनयानि सावराय लायनयानि समाव आबहावा गुबुंले जानाय, सा बाहागोन टेकनलजि आरो हान्था मेला बोथोर सोलायनाय आरो लैथोमानि दाखोर-दाला,



फ्लरकार्बन आरो सिअपि 26 नि आयदानि सायावबो सावरायनाय जादों। जथुमाआव मिरु आबहावा मन्थि यादव आरो जापाननि आबहावा मन्थि फाइजुमी शिनजिरनि गेजेराव जादोंमोन। मावख 'आ बुंदों भारतआ आबहावनि सायाव भारत-जापान दरनैबो हादतफोरनि हेफाजाब होलायनयानि गोनांथिखौ

गानाया लादों आरो भारतआव गोदान टेकनलजि लाबोनायआव जापाननि गेजेरजों नाजानायखौ बाखोनायदों। जथुमानि समाव यादवआ गाहाय मन्थि नरेन्द्र मदिनि सामलायनायआव बोथोर सोलायनायजों जुजिनयआव भारतनि गेजेरजों मोनो हानाय जाफुंसारनायनि सायाव नोजोर होदों।

## कंग्रेसआव प्रशान्त किशरखौ लाफादेरनायखौ लानानै सावरायनाय जादों

गोदान दिल्ली, 8 सेप्टेम्बर: हादतआव बिसायख 'थि सोलोयारि खाथि महरै सिनायथि जानाय प्रशान्त किशरखौ कंग्रेसआव लाफादेरनायखौ लानानै पार्टिआव सावरायदों। बेनि गेजेराव इसार मोनदोंदि जुदि बिनि कंग्रेसआव हावनायखौ गनायथियोब्ला बिखौ अल इन्डिया कंग्रेस कमिटीनि स्पेसेल पेनेलनि बाहागो बानायनो हागौ, जाय बिसायख 'थिनि हाबा फारिखौ नोजोर होगोन। आथिखालाव प्रशान्त किशरखौ पार्टिआव लाफादेरनाय आरो बिनि हाबाफारि मावनायखौ थि खालामनयानि बिबानआ सनिया गान्धीनाव दं। नाथाय दासिमबो बेनि सायाव जेबो थांखि लानाय जायाखै। कंग्रेसनि सुलुड बुंदों जुलाइ दाननि



उननिफ्राय दासिमबो प्रशान्त किशरनि एन्ट्रिखौ लानानै जेबो सावरायनाय जायाखै। आथिखालाव कंग्रेस पान्जाब, राजस्थान आरो छत्तीसगड् बादि गोनांथि राइज्योफोराव गावनिनो इजनिटीनि गेजेराव दावराव दावसि जानाया जेवनायनि मुं लायाखै। सुलुंनि बायदिब्ला, प्रशान्त किशरनि हावनायआ सरासन्हा खान्थिनि थियारि खालामनाय स्पेशल पेनेलनि बाहागो जानो हागौ। बे पेनेलखौ प्रशान्त किशरनि बोसोन होनायनि सायाव बानायनो नागिरदों। किशरआ पार्टि लिडारसिपनो बोसोन होदोंमोनदि, मोनसे ओंखादि पेनेलखौ दाफुनांगो, जाय बिसायख 'थि केस आरो पार्टिनि गाहाय सोलोयारि खान्थिखौ थि खालामनयानि हाबा मावयो। पार्टिनि सुलुंनि बादिब्ला प्रशान्त किशरखौ 2024 नि सरासन्हा बिसायख 'थिनि महरै पार्टिआव एन्ट्रि होनो हागौ। बेनि अनगायै राइज्योआव जानो गोनां बिसायख 'थिनि बिबानखौबो बेयो सामलायनो हागौ। बावयैसो समाव जानो गोनां इडपि, पान्जाब, उत्तराखण्ड बादि राइज्योफोरनि बिसायख 'थिनिफ्राय बिबो जानगार जानो हागौ। फैनो गोनां बोसोरनि फेब्रुवारी- मार्चनि समाव हादतनि दर 5 राइज्योफोराव बिसायख 'थि जागोन। इडपिजों लोगोसे बे गासिबो राइज्योफोर कंग्रेसनि थाखाय गोनांथि दं। मानोना बेवहाय पार्टिआ देरहानो थाखाय नाजागासिनो दं। प्रशान्त किशरखौ लानानै कंग्रेसआवनो गिबियावनो सावरायनाय जादों।

## मुलुगआव करानानि केसफोरनि गासै अन्जिमाया 22 कौटि 18 लाखनिफ्राय बांसिन जाबाय

गोदान दिल्ली, 8 सेप्टेम्बर: थांनाय 24 घन्टयाव हादतनाडै करनानि गासै 37,875 गोदान केसखौ थिसन्याय जादों। थांनाय माखासे साननिफ्राय करनानि केसआ 40 रोजानि गेजेराव फेदों जायखौ रेहायनि बाश्ना होनानै बुजिनो मोन्याय जादों। थांनाय सप्ताहयाव जेब्ला करना केसफोरनि अन्जिमाया गासै 40 निफ्राय बांसिन जादोंमोन अब्ला साफ्रोमबोनि जिंगा सिनाया आरोबाव खनसे बांवावदोंमोन। आथिखालाव हादतआव एक्टिभ केसफोरनि अन्जिमायाबो गासै 4 लाखनि गाहायाव फेदों। आथिखालाव हादतआव करनानि एक्टिभ केसफोरनि गासै अन्जिमाया 3,91,258 सिमाव सौहेंदों। हादतआव दासादि गासै 1.18 जौखोन्दो सांग्रांथि केसआ दड। थांनाय 24 घन्टयाव गासै 39,114 सुबुंफोरा करनानिफ्राय मोजां जादों। मोजां बाश्नाया जाय सुबुंफोरा सानफ्रोमबो इनेक्सन जादों बेनिफ्राय बांसिन सानफ्रोमबो करनानिफ्राय मोजां जादों। भारतआव करनानि रिक्भारि रेटआ 97,48 जौखोन्दो जादों। बेवहाय दासिमाव गासै 3,22,64,05 करनानि बेरामिफोरा मोजां जाखांबाय। फार्से'थि थांनाय 75



सानफोरनिफ्राय हादतनि सप्ताहयारि पजिटिभिटि रेटआबो 3 जौखोन्दोनिफ्राय गाहायावनो थदों। बेवहायनि सप्ताहयारि रेटआ 2.49 जौखोन्दो जादों। बेनि अनगायै सानफ्रोमबोनि पजिटिभिटि रेटआब 3 जौखोन्दोनिफ्राय गाहायाव जादों, जाय 2.49 जौखोन्दो जादों। सरकारआ लान्थियै सुबुंफोरनाव आर'ज गावदोंदि, भाइरासनिफ्राय रेखाथि मोनो थाखाय सांग्रांथि जानायखौ आखु खालामनांगौ

आरो करनानि भेक्सिनखौ थुनांगो। भारतआव गोखैयै सोलिनाय करना भेक्सिन थुनायनि गेजेरजों दासिमाव गासै 70.75 कौटि करनानि भेक्सिनखौ होनाय जाखांबाय। फार्से'थि करना भाइरासखौ सिनायथिनो थाखाय लान्थियै करनानि टेस्टिखौ खालामदों। दासिमाव गासै 53.49 कौटि टेस्टिखौ खालामखांबाय। मुलुगआव करना भाइरास फेनाया 2 बोसोर जासिगोन आरो दिनैसिमबो माखासे

हादतफोराव बेनि गोहोम गोखैनायखौ नुनो मोन्दों। जन्स हपिकन्स इजनिभासिटीनि बायदिब्ला मुलुगनाडै करना भाइरासनि केसआ आथिखालाव गासै 221.8 मिलियननिफ्राय बांसिन जाखांबाय, जेराव थैनायफोरा गासै 4.58 मिलियननिफ्राय बांसिन जाबाय आरो मुलुगआव भेक्सिन थुनाया गासै 5.52 बिलियननिफ्राय बांसिन जाबाय।

## दिल्लीनि थागिबिफोरा 8 दाननि फ्रायनो गोवगो बारखौ हांलानो मोनाखै

गोदान दिल्ली, 8 सेप्टेम्बर: रजथावनि दिल्लीआव सोलिफु बोसोर 8 दान बारलानायनि उनावबो सोलिफु बोसोर 2021 आव बेनि थागिबिफोरा खेबसेबो मेला गैयै बारखौ हां लानो खाबु मोनाखै। करनानि लकडाउन आरो दैजों बोथोरनि समावबो दिल्लीनि आबहावनि इन्डेक्सआ सरासन्हा गोजोनायाव थाखोआवनो थदों। अदेबानि 2020 आव दिल्लीआव गोबां बार मोजां



थाखोनि आबहावायाव हां लानो खाबु मोन्दोंमोन। मिरुआरि आबहावा गुबुंले सामलायरा बर्डनिफ्राय मिथिनो मोन्याय अन्जिमानि बादिब्ला, जानुवारीनिफ्राय आगस्ट दानसिम 243 सानफोराव गेजेर आरो सरासन्हा गोजोथाव थाखोनि आबहावाखौ मोन्दोंब्लाबो नाथाय मोजां गैयै एबा मोजां थाखोनि नड। मख 'जाथावदि, 19 एप्रिलनिफ्राय 31 मेसिम दिल्लीआव लकडाउन जादों। बे समाव बेफोर गासिबो हाबाफारिफोरा बन्द जादों, जायफोरजों आबहावाया गुबुंले जायो। बेबायदिनो जुन दाननिफ्राय सेप्टेम्बर दानसिम 4 दान दैज्जां बोथोरखो जायो। बे समावबो अखा हाबाय थानायजों गुबुंले जाग्रा तवआबो दैआव गलायना नाथायो। अबहावाया साफा आरो अखांआ नीला जायो। नाथाय बे खेबआव

लकडाउन आरो दैज्जां बोथोर जासेयावबो दिल्लीनि एयार इन्डेक्सआ 50 नि गाहायाव एबा मोजां थाखोआव सानसेबो सौफै याखै। 2020 आव हादतनाडै लकडाउननि समाव एप्रिलआव 16 सान आरो दैज्जां बोथोरनि आगस्ट दानाव सान 4 दिल्लीनि थागिबिफोरा मैला गैयै साफा आबहावायाव हां लानो खाबु मोनदोंमोन। बे समाव एयार इन्डेक्सआ 50 निबो गाहायाव फेदोंमोन। आबहावा जरखाफोरनि बादिब्ला 2009 नि जायफोरजों आबहावाया गुबुंले जायो। बेबायदिनो जुन दाननिफ्राय सेप्टेम्बर दानसिम 4 दान दैज्जां बोथोरखो जायो। बे समावबो अखा हाबाय थानायजों गुबुंले जाग्रा तवआबो दैआव गलायना नाथायो। अबहावाया साफा आरो अखांआ नीला जायो। नाथाय बे खेबआव

## बिजेपिनि एमपि अर्जुन सिंनि न'नि बाइजोआव बम गारहरदों

गोदान दिल्ली, 8 सेप्टेम्बर: सोनाब बंगनि नर्थ 24 परगना मासिनिफ्राय बिजेपिनि एमपि अर्जुन सिंनि न'याव थरथाम बमा गारहरनाय जाथाया नुजाथियो। न'आव रेखाथि मावसुमाफोर थाबाबो बे जाथाया जायो। थांनाय मंगलबार खालि जानाय बे जाथायखौ लानानै राइज्योनि गभर्नर जगदीप धनखड्आबो जिंगा सिनाय फोरमायदों। न'या जाज समाव बमा गारहरो बे समाव एमपि अर्जुन सिंआ

न'याव गैयामोन। अदेबानि बिथानि नख'रनि रावबो सुबुंफोरनो बे समाव न'याव गैयामोन। बे जाथायनि उनाव पुलिसआ जाथाइ जानाय जायगायाव सौहैनानै नायबिजिनो आरो न'आवनो लागानाय सिस्टिभि केमेरखौ नायबिजिनदों। जाहाथे बमा गारहरनायखो मिथिनो हायो। बे जाथायखौ लानानै गभर्नर जगदीप धनखड्आ बुडोदि, सोनाब बंगआव हिंसायारि जाथाया जेवनायनि मुं लायाखै

। अदेबानि एमपि अर्जुन सिंनि न'नि बाइजोआव बम बेरफुनाय जाथाया जायो, जाय आयेन आरो बेबस्थानि बिथिजों जिगानि बाश्ना जानानै फेदों। सोनाब बंगनि पुलिसनि फार्सेनिफ्राय बे केसआ इमारजेन्सियै एक्सन लानाय जासिगोन। बिथानि रेखाथिनि केसखौ सिगाडावनो सिएम ममत बेनार्जीनि खाथियाव दिखांखांबाय सोनाब बंगयाव सिबिआइआ आथिखालनि बिसायख 'थिनि उनाव हिंसायारि जाथाइखौ नायबि गसिनो दड।

IN THE COURT OF SPECIAL JUDGE(POCSO), KOKRAJHAR, ASSAM  
 PROCLAMATION REQUIRING THE APPEARANCE OF A PERSON ACCUSED  
 (See section 82)  
 WHEREAS a complaint has been made before me that PUSPA BASUMATARY @ PUSU S/O LATE KORTENG BASUMATARY @ KAMALSINGH, RESIDENT OF VILLAGE, DOLJHORA FV, PS AND DISTRICT OF KOKRAJHAR has is suspected to have committed the offence of AGGRAVATED PENETRATIVE SEXUAL ASSAULT ON VICTIM (NAME WITHHELD) punishable under section 376(2)(f)(i) OF IPC READ WITH SECTION 6 OF THE PCO ACT and it has been returned to a warrant of arrest thereupon issued that the said (PUSPA BASUMATARY @ PUSU) cannot be found, and whereas it has been shown to my satisfaction that the said (PUSPA BASUMATARY @ PUSU) has absconded (or is concealing himself to avoid the service of the said warrant);  
 Proclamation is hereby made that the said PUSPA BASUMATARY @ PUSU of VILLAGE, DOLJHORA FV, PS AND DISTRICT OF KOKRAJHAR is required to appear at (KOKRAJHAR POLICE STATION OR IN THE COURT OF SPECIAL JUDGE, KOKRAJHAR) to answer the said complaint on the day of 7.10.2021  
 Dated, this day of 3<sup>rd</sup> day of September, 2021

# जों लाइ बर' हारि जिउनि दिडा

दंमोन जोंहा राजथावनि नाथाइ ! समनि फाखनाव फानदायसुला फोथाय खेबसफोरनि फान्दायनायाव जानांबाय दिने आनि-थानि । नेरसोन दं, दिन्धि दं, दिनेबो बै दिमापुर, काछार, मायबां, खासपुर, हरितिकर सोरबा बुडे जोंखौ गुबुनारि ? सोरबा बुडे जोंखौ नागालेण्डनि ? जों आसामनि थागिबि हारि हा-फिसा जों बर'सा दं जोंहा इसोरा होनाय..... राव, थुनलाय, हरिमु धोराम, आसार खान्धि ? बेसेदि गोजोनथाव जोंनि रावा संबिजिराव थिसन जाबाय मान होजाबाय गोजौ महराव । सोर बुंदों जोंखौ जारिमिनारि मोन्थाइ गैया होना ? मिथि गौना नों बर' हारिनि सोमोन्दै जानो हागौ नों मिथिया बर' हारिनि जारिमिनखौ ?

बिद्युत चाहारी भकटपारा, जामुगुरि

आंनि खर'सायाव थ नानय हरै मारुआव, थाडे आं गोजोन लानो जिउनि मेंरोम बेलारोम बुब्लियाव, हिमालयनि बै गोजोन सुडेम रंजाथिलिआव; मेंनाय जिउनि डिडाखौ गोजोनग्लाइ होनो-थोर-थोर बोथोर जिउ डिडाखौ खाफ्रानो । हिमालय हाजोनि हरै मारुआव गिखंथाव महरै, दड' नेनानै आंनि लरहाइनाय जिउ डिडाखौ लोगो हमनो बरफनि आइलि जाइलि गुथाला । हुम हुम बारनि गुताला सोगोमदों हास्रिखाव हास्रिखाव, हिमालय हाजोनि बै गोजोन सुडेम रंजाथिलियाव; आंनि मेंरोम जिउ डिडाखौ लांफानो लोगोआव । अन्थाइ बिखा-बार आरो बरफ बेफोरखौ नोंसोर मानो ? ? ? आंनि रंग'लाहां जिउ डिडाखौ खोमसि बुब्लिआव ! हनै हिमालयनि गोजौ हाजो थिखिनिया, गोग्लैनोसै आंनि जिउ डिडा लारोमसालिआव; बरफ आरो बारनि गोरा गोरा गुथालनि दोहौजों । हिमालयनि गोरा गोरा लहानि खुथियाव, गुबुबाय रांखनि बरफ आरो बारनि हिंसायाव, हिमालय सानि गोजोन स'नानि जिडासालिया; गैइला बिसोरनि दुथां आखुनि थाखाय मुलुग संसाराव । आगोमा आंनि मेंरोम जिउ डिडाखौ जोबथा बुब्लिआ थाबाय बेसेबा गेदेर हिमालय हाजोनि सिडाव जिउ सोलेर ।

मुस्रि लक्षन नार्जारी सुबाइझार गोजौ फराइसालि ला:सो: - नेहरु बाजार । जिल्ला - चिरां महकुमा - बिजनी

## सिनाथै अनजालि

हाय अनजालि ! जाखो नों बवेनि ? मिथियाखिसै आं नोंनि थं थेवबो नोंनि फंसे रायदावलांनय रावआ आंखौ सिमनेलाडे । नोंनि समायना गलाब राणी महरा आंखौ खालामबाय हालाय-हाफाय, नोंनि हायनारि गावदं महरा गेलेफैबाय खनले-खनले गोबों दरखंआव । आनदाय होबाय नों आंखौ बारसेल' गलाब बिबारनि बागानाव, नोंनि समायना महरनि हायना सारफावनायाव । खारफा नांबाय नोंजों उन-उन थेवबो मोनाखिसै आं नोंनि थं, गोबोंआवल' गालांबाय नोंनि समायना गलाब राणी महरा ।

मुस्रि सन्तस रामचियारी गामि - खारुवा ( बिलपार ) ला:सो: - खारुवा, 781346 जिला - बागसा

## गोसो थोनाय

आय' हाबाब गोसो थोनाय । मा एसेबां गोदै मा एसेबां मुजिथाव मा जिराद बेलाइ ? बेनो नामा गोसो थोनाया ? बेनो नामा मायानि जेआ ? सोर अबंलावरिया जोनोम होया ? बे अन्याय मोजां मोनाइ आरो गोसो थोनायखौ सानथारा खैमोनदि आं - गोसो थोनाया बेबाइदि सानसे रजेखौ नुयाब्ला । सानसे रजेखौ लोगो हमनो मोनाब्ला सानसे रजेजों मोजां गात्रि बाश्रा राइज्जलायनो मोनाब्ला । गोबों -गोसोआ गोजोन गैथारा । आरोबाव गोजोन गैबावया रजेखौ नुनानै आरो रजेजों राइज्जलाइनानै, लुबैलिया थानानै थानो रजे गैयाब्ला । नांवावगौ बेनिफ्राइ....बाइदि बाइदि. गुबुनजों दाजाथों मोजां मोनाया आंनि रावनोबो दा बिलाइ हरथों आंनि रजेखौ, अबंलावरिनाव आर'ज गाबो आं । अबंलावरिनाव बोर बियो आं । मोजां मोनाइया आंनि फेलें थॉंज जाहाते बे जोनोमाव नों रजेखौनो आं मोनथारथों नों र'जेखौनो मोनथारथों आय' हाबाब गोसो थोनाय ।

थमास बसुमतारि, जनता कलेज सेरफांगुरि टि, डि, सि, सेथि बोसोर, गामि- कसुगांव

# रंजालि गथ' फोरनि सौरा

## थुनलायगिरिनि लायजाम हा फिसा हौवा दाव

गोबों बुंजासे गोरोंथिखौ सुस्रां- लायजाम बियो थुनलायगिरिनि, मिलौ हाबनाय रोसि बरहा बेरे मोदे बाहानि, मेहेर गोनां खबामजों सुजुनाय गोरा आखायनि । दड' बे लायजामावनो हारि, हारामुद अनफावरि- सोरजिलु 'सनानि माला' आरजिनारनि, बोसोन्थि गोनां बिशम्बि- जायखौ जेब्लाबो 'खर' गंगलायै गोसो खानांगौ जायो । गुरैयै खावलायनाय- नोंथाडबो खनथायगिरि जानो सानो नड होमब्ला ? जेराव सुबुं हारिआ महरै-मोखाडे मिनिसोरां, बिखा फांदां, जौस्रां-देतस्रां । हारिनि गोदो लांनय, बावगार लांनय, नेसोंन फोरखौ लाय- सोर बुरखं बावनांगौ दालाय, बिखा बुंजासे सान बोलावरि दं नोंनावबो अराय । जेबोला सानहाब-गोमोहाब, आसार-आखु सुबुं सोदोमश्रीनि, रोखा महरा बेरखंगोन अराय समनि, बेनो थार थुनलाय मोनसे हारिनि । जारिमिनखौ लानानै जेब्ला- बिजिरफले-बिजिरफले नायबिजिरगोन, मोनसे सोदोमश्रीनि थार गुमुरा- अब्लासो मोकथाडव महर मोनगोन । समजों जुजिथाव-जुजिथाव- लंथायखुलिआ थिर-थिरे जोरलांगोन, बिब्बिब्लासो जारिमिनारि थुनलाय बिजिरनाया रोखा जागोन । जाथार मारोब्ला नोंथाड सासे रंग'थि गोनां खन्थायगिरि, हारि सिबिसुला थुनलाय अनसुला- मुगानि बेसेन नागिरिसुला, नोंनि गोबोंनि सानबोलावरिआनो दाफुलंगोन थुनलायनि लैथोमा ।

बै गोजाननि हाजो- नैबे जोंनि खर'सानि मोथांखोर अखां, रुजुनायाव बेसेबा साज्रां-साज्रां, गुनखौ नायबोला बेसेबां आजां-गाजां । थेवबो नाथाय सानफलाडे नड होमब्ला ? अखां सा-सा हाथरिखं थुख्तायनो, गोसोजोंनो हिमालय हाजो बायदि जानो, जोंनि राव थुनलायनि बेरे मोदै बाहा बानायनो । जानोबो हागौ बेखौ सानानै लानांगौ, जोंनि जौगाहानाय- राव थुनलायखौबो, अराय धोनि खालामनो नाजा नांगौ । सुबुंनि देहानो नांगो जानाय-लौनाय गांनाय-उखैनाय- न' बां आय' -अलंकार बेसेबां साजायनाय, सानश्री-मुश्री मिलौनाय, गोदै-गोखा मेजेरनाय, दं थुनलायनावबो अराय उखैनाय । बिदिब्ला फेदो गोनो-गोथो दाख्तामदो, लिहं-माहां सानहां-हां समखौ दा हगारदो, साबायखर गोजोनदो थुनलायगिरि- थाबेनो खोलोम देनानै लिहंदोलाय फारि-फारि । खुगाजों गोब्रामब्ला बावगार लांगोन लिहंनानै दोनोब्ला सानफा-एफा बारायबोला, हाबाब सना नोंबोथ' खम नड- लैथो सा-सा जावगोन थुनलायनि दिडा ।


मुस्रि लालमहन बसुमतारि बिजनी, चिरां

## फिन्नाय मोनै

सानदोंमोन आंलाय नोंनि अन्याय मोनगोन, सानाखैमान आंलाय बेरेखा नोंनि खुगानिफ्राय । हरदोंमोन आंलाय नोंनो अन्याय नेवसिखो मानोबा नों आंनि अन्याय, नेदोंमोन आंलाय नोंनि फिन्नाय हराखै मानोबा नों आंनो फिन्नाय ? सानदोंमोन आं नोंखौनो जीउनि अनजालि बानायनो नाथाय..... फैमाल थांबाय आंनि सानाय । जाबाय आडे गोदाव सोराव नोंनि फिन्नाय मोनैआव ।

मुस्रि मिजिक बसुमतारि फरायसालि-कासिकत्रा थाखो- जिसे (11) दत्तपुर, चिरां ।

हा फिसा हौवा दाव, हा फिसा हौवा दाव । अखा नाइसि नाइसि दान खोमसि हराव रिफेयो आय' दुखु- दाहा नोंनि गाबनाय देखोआ । फांसे बिफानि दालाइयाव बानानै फिसा हौवानि देखो बोयो आय' नों मोनो ? नोंनि दुखुनि देखोआव बुहुमनि सुबुं हारिया जावरि खांदों । गोहो बिर जोहोलावनि बिमामोन नामा नों ? नाथाइ दा जानांबाय दुखुथिया, हा फिसा हौवा दाव ।



मुस्रि जांगिला बसुमतारि 16 नं आमगुरि ( जेजिरमाराखा ) एस.एहस. सेथि बोसोर देबरगाव हाइ स्कुल

## गोजा गलाब बिबार

फालगुन दाननि जावलिया बाराव । सानस'नो हायै लाइमोन बैसोआव गुवार गोसोनि अन्याय लानानै मोजां मोन्दोंमोन रजे आं नोंखौ जेब्ला । अब्ला, नों आंनि बायराव देरानि लांगोनायाव बारदोंमोन सानसैसोनि गोजा गलाब बिबार । दिने बै गोजा गलाब बिबार बहा ?... ? नाथाय, नोंदि बै सिखिफोरनि गेजेरावसो बारहनानै दं । आंनि बेसेबा गोजानावसो. .... । नों, मोदोम जायाखैथ', सिखिफोरजों बिदे सोबजानो । बिबिदिनो, र'जे नोंखौ आं हास्थायदोंमोन मोकथांआव । नाथाय नोंदि बावगारलांबाय अब्लाबो आं नोंखौ गोबोंजों मोजां मोन्दोंमोन... जाफु होनो थाखै..... नाथाय सानाखैमोन नों र'जे आंनि अन्यायखौ सैथो गोथार होना । जाउनाव जानांबाय आं दिने लोगो गोमाजानाय दाउसा माउरिया बिदिब्ला र'जे बुं बै समनि अन्याय बेसेन गैयामोन नामा । जानो हागौ आंदि गोरोंथि खालामबाय बनि थाखाय नों आंखौ नेवसिगारनो हागौ । नाथाय, नोंबो इसेबां गिदिर समाय लानायखौ गियाखैसै । ना नों समायखौ फिसा होनानै सासनबाय नामा । ना फालगुन दाननि थिं थिं सान्दुं दुनायाव रानिज्रलांनो हमबाय नामा बै गोजा

लकनाथ नार्जारी ला:सो: पाटगाव जिला-कक्राझार ।

## रजे नों आंनि

रजे नोंखौ नुनानैनो आंनि गोसोआ बोदोर जाबाय, नोंखौ दसे नुवाब्लानो आंनि गोसोआ उसाव बादव जाखाडे । खेबसे नुनायावनो आं नोंखौ गोसो गोरबोजों मोजां मोनबाय । आदा आं नोंखौ जेब्लाबो आंनि खाथियाव थाबाय थाजानो लुबैयो । नोंनि अनगा आंहा सिगाडव रावबो जिउनि असे लोगो गैयामोन, रजे आं नोंखौनो जेब्लाबो जिउनि मोदाय खालामनानै लानो हास्तायो ।

थरायना पुजा बड'सा बिजनी कलेज । थाखो - एइस.एस. सेथि बोसोर ला:सो: - दैयालु नोगोर ( बिजनी ) जिला - चिरां

## जोंनि आंगो गामि

फैलाव हायेन हाजोनि सेरफां ग्रेम ग्रेम थुरिनि न' । फैलाव फोथार अरननि सेर सोमखोर आबादथिलि । दुगैग्रा गाथोन जिरि दैसानि र्गु लाइमोन गोबोंनि बैख'नथिलि । बेसे हायना सोमखोर मिथिंगा बेनो जोंनि आंगो गामि ।

मुस्रि दैथुन गयारी गामि - गोदान बरगाव । ला:सो: बेतबारी जिला - बागसा

## गुमुर गैथै भ्रमण

एस आइ आर बसुमतारि

मासे फिसा इनजर इंगिनि गुदुं नागारनानै हाग्रा-बंग्रा हा सिडवनि हानजा दैदेननानै दाब-दाब गिदिं-गिदिं बेयाव दसे, बैयाव आयदासे एखनब्ला खिफिदेरनाय, एखनब्ला एरफुनाय बुहुमखौ बागदाव खांहोदों । राजखान्थिनि फनैसो मन्थ्रजों साधु बैरागिनि गिरुया जि जोख्लोबनानै गोदाने दाफिननाय जीउ राहाया दान्दिसे बुहुमाव फेरलेबसे रंजानाय लाबोदों । नाथाय सियाला गोथां महर लाब्लाबो बियो सियालानोखा; दावखाया दावराइनि गां थुदेरब्लाबो गुबै दावखायानो खा । बैरागीनि गाब गाब्लाबो आखुथाया इनजर इंगिनिनि; बनि देखोफोराबो गलिनो रोडै गोरा अन्थायनि बिदै । दा बै इनजर इंगिनिया भ्रमणनि थाखाय थांबाय स'नानि सिंहासनखौ नागारनानै गावखौ गुबै सन्यासी दिन्थिनो नाथाय बवे दिकनि भ्रमण रावबो गुमुर मोनाखै ।



## सिद्धार्थ शुक्ला शैनायनि उनाव पारास छाबड़ा आरो आसिमआ गावसोरनि गेजेरनि सुथुरखौ बावगारलायदों

मुम्बाई, 8 सेप्टेम्बर: बिग बस 13 आव माखासे सोमोन्दोआ बायनो रोडै जादों ब्ला माखासेआ अरयसमनि थाखाय गावजों- गाव गोजान जादोंमोन। बेबादिनो पारास छाबड़ा आरो आसिम रियाजमोनहा। आथिखालाव सिद्धार्थ शुक्लानि शैनायनि उनाव थासाखौ माखासे सोलायनाय नुनो मोन्दों। आसिम आरो पारासआ आथिखालाव इनस्टाग्रामआव गावजों-गावखौ फल' खालामलायदों। बेल' नडा पारासआ आसिमनि थाखाय इनस्टाग्राम स्टरीआव माखासे पस्टखौबो खालामदों। बिग बस 13 नि देरहागिरि सिद्धार्थ शुक्लानि शैनायनि उनाव साफ्रोमबो दुखुआव गोएलेंदों।

स्व'नि समाव सिद्धार्थ आरो आसिमनि गेजेराव जोबोद मोजां लोगनि सोमोन्दोआ दडमोन। उनाव बिसोर सानैनि गेजेराव एरैबादि दावराव-दावसि जादोंदि, बेयो सुथुरआव सोलायलादों। स्व'नि उनाव बिसोर सानैआ आलादा-आलादा इन्टारभउफोराव बुंदोंमोनदि, स्व'नि बाश्राफोरखौ स्व'आवनो गारबोदों। बेनि थासाखिनो एरैबादि जायोदि, सुबुडा रागा जोंग्रा एबा सावरयग्रा जायो। बेबादिनो आसिम आरो पारासनि गेजेरावबो गोबां दावराव-दावसि जादों। जायनि उनाव बिसोर सानैनि गेजेराव जानगार जादोंमोन। आथिखालाव सिद्धार्थ शैनायनि उनाव पारास आरो आसिमआ



जानो हागौ गोजाम जाथायHिरखौ बावगारबाय। बिसोर सानैआ गावजों-गावखौ इनस्टाग्रामआव फल' खालामदों। पारासआ आसिमनि गोदान भिडिअ देखो उड्ल्ट इन पेननि थाखाय बिनो गाहाम

हामलायथि होदों आरो इनस्टाग्रामआव माखासे पस्ट शेयार खालामदों। बिग बस 13 आव आसिम आरो पारासनि गेजेराव गोबां दावराव-दावसि जादोंमोन। पारासआ आसिमनि सायाव पारसनेल कमेन्टफोरखौ खालामदोंमोन। बेनि उनाव दुइटरआव सुबुफोर आसिमखौ

सापर्ट खालामदोंमोन। आसिम आरो सिद्धार्थनि गेजेरावबो गोबां दावराव-दावसि जादोंमोन। सिड शैनायनि उनाव आसिमआ दुखुआव दड। बियो सिद्धार्थखौ गोसोखानानै इनस्टाग्रामआव माखासे पस्ट शेयार खालामखांबाय।

## गाहाम देहानि राहा

### डायबिटिस बेरामिफोरनि जोखोम जानायनि थाखाय बेन्देस दिहुन्दों

डायबिटिस बेरामिफोरनि जोखोम जानायनि थाखाय आइ आइटि कानपुरनि बिगियानगिरिनि गेजेरजों बानायनाय बेन्दीसआ रमबान फोरमान जानो हागौ। बे बेन्दीसआ बेसेन खम जानायजों लोगोसे गोहोम गोनांबो। बेखौ गोजाम जोखोम जानायवबो बाहायनो हागोन। बेखौ मेक इन इन्डियानि गेजेरजों बानायनाय जादों। बेयो माहारियारि पेटेन्ट मोनखांबाय। बेखौ एनजरनि इन भिट्ट आरो इन भिभ मेडेलनि सायाव आन्जाद नायनायनि उनाव गनायथिनाय जादों। बे बेन्दीसआव आयडिन आरो साइट्रिक एसिड बादि माखासे यजक अनुफोरखौ होफानाय जादों। बे बेन्दीसखौ लैथोमा शैबाल अगर्निफ्राय मोनो हानाय मोनसे मिथिंगायारि नेचुरेल पलिमार आरो आगारजनि गेजेरजों बानायनाय आसि बिमानि जोखोम जानायआव डेरिस खालामनायाव सेरिसिन, आयडिन आरो साइट्रिक एसिड



बादि माखासे अनुफोरखौ सरजाबनायनि हाबा मावनायनि रुजुनायाव गोजाम जोखोम जानायनि सोमोन्दोआव बेनि फाहामथाय होनाय आरो होबथाबनाय गुननि आन्जादखौ अगर्'नि गेजेरजों नायनाय जादों। बे दिहुनथाया जरखा महरै डायबिटिस बेरामिनि जोखोम जानायनि फाहामनायनि थाखाय अगर्खौ बेन्दीसआव बाहायदों। गोबाब आरो सरासन्हा जोखोम जानायव बेन्दीसनि सिंगेल लेयार, बाइलेयार आरो माल्टि लेयार थानाय हाइड्रजेन फिल्मखौ बाहाय नांगो। जाफुसारनायनि

बे हाबाफारि टेक्नलजिनि थियारि खालामनाय थाखोनि थामथि खोलोबआव आथिखालाव 5 कि:मि: दाथायनि जोखोम जानायजों लोगोसे एन्जरनि मडेलनि सायाव बे बेन्दीसखौ आन्जाद नायनाय जादों। बेवहाय सिंगेल लेयार डेरिसआ दंफा देरो। इयुनाव सेशा आरो अमानाव बे बेन्दीसखौ आन्जाद नायनाय जागोन। जोबथा खोलोबनाय नेमखाथि बादिथै आन्जाद नायनायआ थाफादेरगोन। बे खोलोबआ फुरा जानायनि उनाव बेखौ बाजाव फानाय जागोन।

## बिग बस अटिटिआव गात्रि आन्डारगारमेन्टसखौ लानानै दिब्या आरो नेहानि गेजेराव दावराव-दावसि



गोदान दिल्ली, 8 सेप्टेम्बर: रियेलिटी श्व' बिग बस अटिटिआव जेराव सुबुफोर गाव-गावनि खेलाखौ लानानै खौराडाव थायोब्ला गुबुन फासैथि बिसोरो गावजों गाव गोबां दावराव-दावसिबो जाबाय थायो। आरोबाव खनसे बिग बस अटिटिनि न'आव फावखुंग्रि दिब्या आगरवाल आरो दँखोगिरि नेहा भसीननि गेजेराव दावराव-दावसि जादों। बिसोर सानैनि गेजेराव सम सम दावराव-दावसि आरो दान्थे-बिदान्थे जानायकौ नुनो मोनो। आथिखालाव दिब्या आगरवाल आरो नेहा भसीननि गेजेराव गात्रि आन्डारगारमेन्टसखौ लानानै दावराव-दावसि जादों। मख'नो गोनांदि, मंगलबारखालि फोसावदि

खालामनाय एपिसडआव दिब्या आगरवालआ बाथरुमआव थाडो। बेवहाय बियो नेहा भसीननि गात्रि आन्डारगारमेन्टसखौ दोन्नाय नुयो। बेखौ नुनायनि उनाव दिब्याआ समिता शेद्री आरो मुस्कान जट्टानिआव सौथि सोडोदि बे आन्डारगारमेन्टसआ नौसोरनि नामा? बेनि उनाव दिब्याआ गुबुन सुबुफोरनाबो सोडोदि, बाथरुमआव जाय गात्रि आन्डारगारमेन्टसखौ दोन्दों बेयो सोरनि? बेनि उनाव नेहाया भसीनखौ बे गात्रि आन्डारगारमेन्टसआ गावनि होन्नानै बुडो। बेनि थाखाय नेहाया निमाहा बिनानै बुडोदि, गाव बेखौ साखोन-सिखोन खालामनो बावदों। बेनि सायाव दिब्या आगरवालआ नेहाखौ

बुडोदि, बेयो मुगैथाव। दिब्यानि बे बाश्राखौ खोनानानै नेहा भसीनआ रागा जोडो। बियो फिन्जाथाय होनानै बुडो-आंनो मोनफ्रोमबो हाबाफारियाव नौनि एक्सट्रा बिबुंथिनि गोनांथि गैया। नौनि न'आव थानाया मुगैथाव आरो बेयो बांबाय। नेहा भसीनआ बेवहायनो थाबथायाखे बियो दिब्याखौ बुंबावो-आं बेखौ बेवहाय सुनो थाखाय दोन्दों। नौ सासे मुगैथाव आइजो। नौ जेखि बुडो बेयो मुगैथाव। आं शेयार खालामदों बेनि थाखाय आं निमाहा बियो, नौ बेखौ मानो आयदा बानायदों, बेयो मोनसे फिसा बाश्रा। मख'नो गोनांदि, थाबैनो बिग बस अटिटिआ बिग बस सिजन 15 आव सोलायसिगोन।

## अक्षय कुमारनि बिमाया रुंसारि जाबाय

गोदान दिल्ली, 8 सेप्टेम्बर: बलिउड फावखुंग्रि अक्षय कुमारनि बिमाया रुंसारि जाबाय। बे बाश्रानि खौराखौ अक्षयआ गावनो गावनि दुइटर आरो इन्स्टाग्राम एकाउन्टनि गेजेरजों होदों। फावखुंग्रिनि बिमाया थानाय माखासे साननिफ्राय बेरमाव गोएलैना दडमोन आरो आइसिडआव थिसनजादोंमोन। 7 सेप्टेम्बरआव अक्षयआ गावनि इन्स्टाग्रामआव बिमानि थाखाय मोनसे पस्टखौ सेयार खालामदोंमोन। जेराव बियो फोरमायदोंमोनदि थानाय माखासे घन्टया गोबां जेना गोनां जादों आरो बियो फेन्सफोरखौ इसोरनाव आर'ज गाबनो खावलायदोंमोन। आथिकालाव फावखुंग्रिनि बिमाया बे मुलुगखौ अरयसमनि थाखाय बिदाय लाबाय। बे बाश्रानि खौराखौ होनानै अक्षयआ मोनसे दुखुनांथाव पस्टखौ सेयार खालामदों। गावनि पस्टआव अक्षयआ लिरदों। बियो आंनि गासिबोमोन आरो दिने आं गोसोसिडव गोबां दुखुखौ हमदांथिदों। आंनि बिमा श्रीमती अरुणा भाटियाआव दिने फुंआव



गोजेने बे मुलुगखौ बिदाय लाबाय। बियो आंनि बिफाजों गुबुन मुलुगआव थानानै लोगो हमहेबाय। आं आरो आंनि नख'रआ जाय जेना गोनां समखौ बारग' होहरदों बेवहाय आं नौथांमोननि इसोरनि आर'ज गावनायखौ नेनानै दड: अम शांति। अक्षय कुमारआ गावनि मावख'आरि इन्स्टाग्राम एकाउन्टआव मोनसे पस्टखौ सेयार खालामदोंमोन। बे पस्टआव अक्षय कुमारआ लिरदों आंनि बिमानि देहानि फारसे नौथांमोननि जिंगा सिनाय आरो सोदोबफोरजों आं रंजा खादों। बेयो आं आरो नख'रनि थाखाय गोबां जेनां गोनां सम। नौथांमोननि मोनफ्रोमबो इसोरनाव आर'ज गावनाया गिदिर हेफाजाव जागोन। मख'नो गोनांदि, गोनांदि बावैसो समाव खौरां फैदोंमोनदि अक्षय कुमारनि बिमा अरुणा भाटियानि देहायाव गात्रि जानायनि जाहोनाव बिखौ मुम्बाइनि हिन्दुजा देहा फाहामसालियाव थिसन्नाय जादोंमोन। बे जाहोनाव अक्षय कुमारआबो गावनि सावथुननि सुटिंखौ गेजेरावनो नागरानानै हाखु-दाखुयै मुम्बाइआव फैफनदोंमोन।

## आलिया भाट्टनि सावथुन डार्लिन्स 'नि सुटिंआ आबुं जाबाय

गोदान दिल्ली 8 सेप्टेम्बर: बलिउड फावखुंग्रि आलिया भाट्टआ थानाय माखासे सानफोरनिफ्राय गावनि रिलिज जानो गोनां सावथुन डार्लिन्स' नि सुटिंआव नांथाबनानै दडोमोन। नाथाय आथिखालाव बे सावथुननि सुटिंआ फुरा जाबाय। सावथुननि सुटिंआ जोबनायाव सावथुननि फुरा टीमआ केक हानानै रंजानायखौबो फालिदों। जायनि सावगारिफोरखौ ससियेल मिडियाआवबो सेयार खालामदों, फासैथिं सावथुननि रेप अपनि उनाव आलिया भाट्टआ सावथुननि सुटिंजों सोमोन्दो गोनां प्रिशियस भुमेन्टफोरनि मोनसे भिडियखौ सेयार खालामदों। सावथुननि रेप अपनि सावगारिफोरखौ रेड चिलिज एन्टारटेनमन्टनि मावख'आरि इन्स्टाग्राम एकाउन्टनि गेजेरजों सेयार खालामदों। जेराव फुरा कास्ट आरो क्लू मेम्बार्फोरखौ लोगोसेयै केक हानाय नुनो मोन्दों। बे सावगारिफोरआव आलिया भाट्ट, बिजय बर्माया फुरा क्लू मेम्बार्फोरजों लोगोसे रंजानानै केक हादों। सावथुननि रेपअपआव साफ्रोमबो सुबुफोरखौ गोबां खुसि



जानायबो नुनो मोन्दों। फासैथिं आलिया भाट्टआबो गावनि मावख'आरि इन्स्टाग्राम एकाउन्टनि गेजेरजों मोनसे भिडियखौ सेयार खालामदों। बे भिडिययाव सुटिंनि समनि गासिबो सावगारिफोर आरो भिडियखौ कम्पाइज खालामनाय जादों। बे भिडियखौ सेयार खालामनाय जादों। बे भिडियखौ सेयार खालामनानै आलिया भाट्टआ केप्सनआव लिरदों डार्लिन्स, बेयो रेप अप। जों सावथुन बानायनायाव गाव गावनि बेस्टखौ होदों आरो जों आसा खालामदोंदि, नौथांमोनहा सावथुनखौ मोजां मोनगोन। मख'नो गोनांदि सावथुन

डार्लिन्सखौ रेड चिलीज एन्टारटेन्टमेन्ट आरो एटरनल अनसाइन प्रडाक्सननि बेनारनि सिडाव बानायदों। जायखौ जसमीत के रीलआ बिथोन होदों। सावथुनआव आलिया भाट्ट सेफालि शाह, रशान मेथ्यु आरो बिजय बर्माया गाहाय फाव खालामदों। शेफाली शाह आरो रशान मेथ्युआ सावथुननि सुटिंखौ थानाय दानआवनो फुरा खालामखांबायमोन। फासैथिं आथिखालाव आबुडै सावथुननि सुटिंआबो जोबबाय। सावथुननि सल'खौ परभेज सेख आरो जसमीनआ लिरदों। फासैथिं बे सावथुनखौ गौरि खान, आलिया भाट्ट आरो गौरब बर्माया बानायदों।

## अनिल कापुरनि नायक सावथुनआ 20 बोसोर आबुं जाबाय

गोदान दिल्ली, 8 सेप्टेम्बर: बलिउड फावखुंग्रि अनिल कापुरआ 20 बोसोर सिगां मोनसे सावथुनआव फाव खालामदोंमोन। बे सावथुननि मुडा नायकमोन। अनिल कापुरआ सावथुनआव गाहाय फावखुंग्रिनि फाव खालामदोंमोन। बे सावथुनआ

राजखाथि मुलुगनि थाखोमाना थानाय बाश्राफोरखौ सोराडाव लाबोनाय सावथुनमोन। बे सावथुननि रिलिज 20 आ बोसोर जाबाय। बेबायदियाव अनिल कापुरआ गावनि बे सावथुनखौ गोसो खादों। बियो ससियेल मिडियाआव सावथुननि थाखाय जरखा पस्ट

लिरदों। सावथुन नायकआ अनिल कापुरनि केरियारनि थाखायबो गोबां गाहाय सावथुनमोन। 2001 आव रिलिज जानाय बे सावथुनआव रिलिज जानाय बे अनिल कापुरनि फावखौ गोबां बाख्नायदोंमोन। बावैसो समाव अनिल कापुर ससियेल

मिडियाआव सावथुनखौ गोसोखानानै मोनसे पस्ट सेयार खालामदों। अनिल कापुरआ सावथुननि सीननि सावगारिखौ सेयार खालामदों। बे सावगारिया सावथुन नायकनि बयनिखुडो बांसिन मोजां मोनजानाय सीननि। अनिल कापुरआ गावनि मावख'आरि इन्स्टाग्राम



एकाउन्टनि गेजेरजों बे सावगारिखौ सेयार खालामदों। बे सावगारियाव अनिलआ आबुडै हाजों बुंफबनाय। सावगारिजों लोगोसे केप्सनआव अनिल कापुरआ लिरदों, 20 बोसोर सिगां आं सानसेनि रियेल नायक सिपम जादोंमोन आरो माखासेआ गासिबो जारिमिन

जादों। माखासे सुबुफोर गाव गावनि 'नोजोरखौ होदोंदि, आं नायकखौ मानो खालामामोन। नाथाय आं मोनथिगौदि बे सावथुनखौ खालामनाया गोनांथारमोन आरो आं बेनि मैसेजआव फोथायदों। आथिखालाव जों बेनि 20 बोसोरनि फोबोखौ फालिदों।

## सुइसाइड बमाजों गाग्लोबग्रा नेटवार्कनि गाहाय ताजमीर जबादनो इन्टेलिजेन्सनि डिपुटि चीफ बिबान गथायबाय

गोदान दिल्ली, 8 सेप्टेम्बर : आफगानिस्तानाव तालिबाननि गोदान सरकाराव ताजमीर जबादनो डिपुटि चीफ अप इन्टेलिजेन्स बिबानखौ होबाय। ताजमीर जबादन सोमोन्दै बुनाय जायोदि, बियो पाकिस्ताननि सान्थिजों खाइथि सोमोन्दो दड आरो बियो सुइसाइड बमाजों गाग्लोबग्रा नेटवार्कखौ सामलायोमोन। गोबां हादतफोरनि रैखाथि आरो संगालि बिबानगिरिफोरा ताजमीर जबादखौ काबुलआव गिख्थाय गाग्लोबनायफोरनि थाखाय दायनिगिरि सुइसाइड बमाजों गाग्लोबग्रा निटवार्कनि गाहाय होन्नाने फोरमायथिदों। तालिबाननि सान्थिनि गुदि बिथानि गाहाय सोद्रोमा मानिजानाय ताजमीर जबादआ



आफगान सरकाराव थिसनजानाय सा 33 दैदेनगिरिफोरनि गेजेराव दै, जायफोरनि मुंखौ मंगलबारनि मोनाबिलियाव बुंथिगिरि जबीउल्लाह मुजाहितला फोसावना होदोंमोन।' ताजमीरआ गोदान डायरेक्टर जेनेल अफ इन्टेलिजेन्स आबुल

हक बसीकनि सिडव डिपुटि चीफ महेर हाबामावगोन। गुबुन गुबुन हादतफोरनि माखासे आजिरा मोनाय आरो बारग' रैखाथि बिबानगिरिफोर बुंदोंदि, बावैसो सिगानि बोसोरफोरव काबुलआव बयनिखुइबो बांसिन सिलिखार

खालामलानाय सुइसाइड बमाजों गाग्लोबनायफोराव ताजमीर जबादन आखाय दडमोन। सासे बिबानगिरिया जबादखौ डिपुटि चीफ अफ इन्टेलिजेन्स बानायनायखौ गाग्रि खौरां होन्नाने बुंदों। गुबुन सासेबाव सोनाब संगालिनि बारग' बिबानगिरिया बुंदोंदि, जबादआ सुइसाइड नेटवार्कखौ दैदेन्दों आरो पाकिस्ताननि आइएसआइ आरो सान्थि रैखाथि फसंधानफोरजों खाथि सोमोन्दो दड। आफगानिस्ताननि संगालि एजेन्सि एवा एनडिएस गाहाय बिबानगिरि महेर सिबिथाय होखांनय रहमतल्लाह नबीनआ 2018 आव सुइसाइड बमाजों गाग्लोबग्राफोरनि मोनसे ट्रेनि

मिरु, अल हमग्रा शहीत बिगेडखौ जौगाखांनयिन थाखाय जाबदखौनो दायनिगिरि गनायथिदोंमोन। जायखौ मौलबि जबीउल्लाह मुडैबो मिथिनाय जायो। बे मिरुआव सुइसाइड बमाजों गाग्लोबग्राफोर जबादन सुपार भिजनआवनो ट्रेनि लायोमोन। जबाद बे समाव पाकिस्ताननि पेशावर सहराव थायोमोन। पाकिस्ताननि ट्राइबेल ओन्सोल मीर अलीआव बमाफोरखौ आन्जाद नायनायाव दबादला जौखोम जादोंमोन। बेनि उनाव आइएसआइया पाकिस्ताननि पासपर्टजों जबादखौ फाहामथाय होनो श्रीलंकायाव लांदोंमोन। नाथाय फाहामथाय मोजां जायैनि उनाव कराचीआव लांफिनो। जिहादी हान्जाफोरखौ गोखोडै ट्रेक खालामग्रा वेबसाइट दा लं वार जार्नेलआ 2013 सिम रिपर्ट होबाय थादोंमोनदि जबादआ उतखारि फसंधान हक्कानी नेटवार्क आव सासे गागि कमान्डारबोमोन आरो जुथायै गुबुन मोनसे तालिबान कामान्डार दाबुदजों काबुल एटैक्ट नेटवार्कखौ लीड खालामोमोन।

## भुमध्य सागरआव भारत आरो मिश्रनि दावहारु गाथोनफोरनि जुथाय हुदा खालामदों

गोदान दिल्ली, 8 सेप्टेम्बर: नेभिफोरनि दावहारु गाथोन आइएनएस तबरआ मिश्रनि नेभिफोरनि दावहारु गाथोनजों लोगोसे भुमध्य सागरआव सान्थियारि हुदा खालामो। बिबानगिरिफोरा थानाय मंगलबारखालि फोरमायनाय बादिब्ला, फारनैथिजायनि सान्थियारि हेफाजाब होलायनायखौ बाययहोनायनि बे हुदाखौ खालामनाय जायो। बेनि गेजेरजों थानाय रबिबारखालि खुनाय हुदायाव माखासे थालाय-फैलायफोर दंफयोमोन जेराव नेभिफोरनि माखासे रोखोमनि हाबाफारिफोरनि हुदा खालामनाय जायो। बे हुदायाव आलादा-आलादा रोखोमनि हाबाफारिफोर दंफयोमोन आरो बेनि गेजेरजों लैथोमानि सिडव सन्देश खालामथाव गाथोनखौ हमनायनि हाबाफारि, फोसावनाय हाबाफारि, लैथोमायारि ओन्सोलाव जुथायै जौगाखां होनाय बायदि हाबाफारि दंफयोमोन। बे हुदानि गाहाय जर'खागिरिफोर



गावजों-गावनि गाथोननि सायाव हेल अपारेसन सालायदोंमोन। बे हुदाया मोनने हान्जानि नेभिफोरनि गेजेराव अभियानखौ बाययहोनाय केसआव मख'जाथाव। सुलुनि बादिब्ला, भारत आरो काजाकिस्ताननि सान्थिफोरनि बोसोरसालिया जुथाय हुदा काजिन्ड-21 नि 5 थि हाबाफारिया सोलिगासिनो दड। दरने हादरफोरनि गेजेराव सान्थियारि गोहोखौ गोखों खालामनो थाखाय बेखौ जुथाय हुदा खालामनाय जायो। बेनि सोमोन्दै भारतयारि सान्थिफोर

दुइट खालामोदि, भारत आरो काजाकिस्ताननि सान्थिफोरा काजाकिस्ताननि ट्रेनि होग्रा नड आयशा बिबियाव थानाय 30 आगस्टनिफ्राय 11 सेप्टेम्बरसिम कजिन्ड-21 खौ खुनाय जादों। बे हुदाया दरने हादरफोरनि सान्थिफोरनि गेजेराव जुथाय ट्रेनि। भारतयारि सान्थिफोरनि फार्सेनिफ्राय बिहार रैजिमेन्टनि सा 90 मावसुमाफोरा कमान्डारफोरनि दैदेननायाव बाहागो लादों। काजाकिस्तान सान्थिनि फार्सेनिफ्राय गंसे कम्पानी गुपआ बाहागो लादों।

## दिल्लीआव गनेश चतुर्थीखौ सरासन्त्रा जायगाफोराव फालिनो मोन्नाय नड

गोदान दिल्ली, 8 सेप्टेम्बर: करना इनफेक्सननि जाहोनाव डिडिएमएआ सरासन्त्रा जायगाफोराव गनेश चतुर्थी फोबोंखौ फालिनो थाखाय गनायथि होनायखौ नेवसिगारदों। कभिड-19 इनफेक्सन जानायनि जाहोनाव बेबादि जादों। मोनसे बिथोन होनायआव डिडिएमएआ बुंदों जिल्ला मेजिस्ट्रेट आरो पुलिस कमिसनारआ भगवान गनेशनि मुसुखाफोरखौ तम्बु एबा पान्डालाव दोननाय एबा गायसनया बे बाथ्राखौ नोजोर होनांगौ। लोगोसेनो धोरोमारि आरो समाजयारि जायगाफोराव सुबुंफोरनि होंगो दोंगो जाया बे बाथ्राखौ नोजोर होनांगौ। डिडिएमएआ सुबुंफोरखौ न'आवनो फोबों फालिनो



बोसोन होदों। बिथोन होनायआव बुंदोंदि, गनेश चतुर्थीखौ बे दानआव फालिनाय जागोन। फोबों आरो जथुमाफोरव होबथानाय आरो कभिड-19

इनफेक्सननि थासारिखौ नोजोर होनाने थांखि लानाय जादोंदि गनेश उत्सबखौ राइज्योयारि जायगाफोराव फालिनो गनायथि होनाय जानाय नड।

## पाकिस्तानआ गावनि नख 'र आरो सिमना बारनानै हिंसाखौ बांसिन होबाय थादों

पेट्र, 8 सेप्टेम्बर: इउएनआव भारतआ पाकिस्ताननि सायाव गोखों रावजों गाग्लोबो। पाकिस्तानखौ सावरयनाने भारतआ बुडोदि, पाकिस्तानआ गावनि हादर सिडव आरो गावनि सिमनाफोर बारनानैबो हिंसाखौ बांहोबाय थादों। इउएननि जौसांखौ पाकआ आबुथि गैयै रावनि थाखाय बाहायदोंमोन। अरायथा मिसनआव भारतनि गिबि नेहाथारि बिदिशा मेत्राया इउएनआव बुंदोंदि, गोजोननि हारिमुआ खालि मोनसे थांखिल' नडा, जायनि सायाव सन्मिलनफोरव सावरयनाय आरो रंजाथाय फालिनाय जायो। बेयो सोद्रोमा हादरफोरनि गेजेराव आरो बिसोरनि मुलुगयारि सोमोन्दोफोरव सांग्राडै बेयाव थाफानायनि गोनांथि दड। बिथाड बुंवाबोदि, भारतनि हेंथायै आबुथि गैयै रावनि थाखाय इउएन जौसांनि मुलाम्फाखौ लानो पाकिस्ताननि थान्दै हान्जाया खेबसे नाजाबावनायखौ नुनो मोन्दों। अदेबानि बियो गावनि हादरआव आरो सिमनाफोरव हिंसाखौ बांहोदों, नाथाय बेबादि नाजानायफोरखौ जों नेवसिगारो आरो बिखौ सांखारियो। मख'जाथावदि, इउएनआव पाकिस्ताननि थान्दै मुनीर अकरमआ जम्मु-काशमीरनि आयदाखौ दैखानाय आरो मुंदांखा पाकिस्ताननि हेफाजाबगिरि दैदेनगिरि सैयद आली शाह गिलानीनि सोमोन्दै जथुम न'मायाव बिबुंथि होनायनि उनाव भारतआ बे फिनजाथायखौ होदों।

## इन्डनेसियानि गंसे जेलाव अर नांनयजों सा 41 कैदिफोरनि जिउ ख'हा, सा 39 आ जोखोम



इन्डनेसिया, 8 सेप्टेम्बर : इन्डनेसियानि राजथावनि खाथियाव थानाय गंसे जेलाव फुंआव अर खामनायजों खमैब्लाबो सा 41 कैदिफोर थैयो। बेरफार्से सा 39 गुबुनफोर जोखोम जायो। बिफाननि बुंथिगिरि निका अपारिआन्तीया बुंनय बायदिब्ला, बे अर राजथावनिनि बाइजोयारि ओन्सोलाव थानाय तंगेरा जेलनि सी ब्लकआव खामो। बिबानगिरिफोरा अर नांनयनि जाहोनफोरखौ नायबिजिरि गासिनो दड। सुलुनि बायदिब्ला, बे जेलनि गोहोया सा 1225 कैदिफोरखौ लाखिनाय। नाथाय बेयाव 2 रोजानिखुइ बांसिन कैदिफोरखौ दोन्दोंमोन। अर

नांनय समाव जेलनि सि ब्लकआव सा 122 कौदिफोर दड मोन। बे जाथाइनि उनाव गोबां अन्जमानि पुलिस मावसुमाफोर आरो सान्थिफोर अर हुखोमोरनाय खामानियाव नांथाबो। बुंथिगिरिआ फोरमायनाय बायदिब्ला माखासे घन्टा नाजानायनि उनाव अरखौ सामलायनो हायो आरो गासै कैदिफोरखौ देहा फाहामसालियाव लांनय जायो। मख'नो गोनांदि, जेलनिफ्राय खारनो थाखाय आरो दावराव दावसिनि जाहोनाव अर नांनया इन्डनेसियाआव सरासन्त्रा बाथा। बे जेलाव होंगो दोंगोया मोनसे सरासन्त्रा जेना जाबाय।

## गवा, गुजराट, पान्जाब, उत्तराखन्डजों लोगोसे माखासे ओन्सोलफोराव गोबां अखानि सांग्रांथि



गोदान दिल्ली, 8 सेप्टेम्बर: सा भारतजों लोगोसे हादरनि माखासे बाहागोफोराव थानाय सुबुंफोरखौ थाबेनो गरमनिफ्राय रेहाय मोन्नायखौ नुनो मोन्नाय जादों। बोथोर बिफाननि गेजेरजों गावनि गोदान आपडेटआव फैगौ माखासे सानफोरनि रिपर्ट होयो, जेराव गोबां अखानि बाथा बुंनय जादों। सुलुडव फोरमायनाय बादिब्ला, मौसुमि बोथोरनि ट्राफआ गावनि सरासन्त्रा

थासारिनि खोलाहा दड। आइएमडिनि बादिब्ला, फैगौ 4-5 साननि समाव बेयो सरसन्त्रा थासारिनि खोलाहा थानो हागौ। मोनसे थि गाहाय नारसिन्थायनि ओन्सोला खोला-सान्जा मध्य प्रदेश आरो सा बिदर्भनि खाथि-खालानि बाहागोफोराव। फैगौ 4-5 साननि गेजेराव खम नारसिन्थाया सा-सोनाब फार्सें बारायनो हागौ। बे मौसुमि बोथोरनि सिस्टेमनि जाहोनाव

आइएमडिआ 8-11 सेप्टेम्बरसिमाव गेजेर महाराष्ट्र, कंकण, गुजराट राइज्योआव गोबांनिखुइ बांसिन अखा हागोनखौ हमदांनय जादों। गेजेर महाराष्ट्र आरो कंकणनि माखासे जायगाफोरवबो गोबां अखा हानो हागौ। बेबादि थासारिया गुजराटआवबो थाबाय थागोन, जाय 9 सेप्टेम्बरसिम थाबाय थानो हागौ। बेरफार्सें आइएमडिआ दिनेनि थाखाय गुजराट, कंकण आरो गवाआव रेड एलार्ट फोसावो। सा-सोनाब भारतनि माखासे बाहागोफोराव 11 सेप्टेम्बरसिमाव थोजासे बिबांनि अखा हानो हागौ। बे समाव पान्जाब, हिमाचल प्रदेश, राजस्तान, हरियाणा, उत्तर प्रदेशआवबो गोबां बिबांनि अखा हानो हागौ। बेनि गेजेरजों आइएमडिआ दिनेनि थाखाय उत्तराखन्ड आरो पान्जाबआव अरेन्ज एलार्ट फोसावो। सुलुनि बादिब्ला, शनिबारखालि सोनाब बंगनि लैथोमा सिं बाहागोआव खम नारसिन्थायनि थासारिआ सोमजिगोन आरो बेयो सा-सोनाब फार्सें आवगायगोन।

गोदान दिल्ली, 8 सेप्टेम्बर: रैखाथि हान्जाफोरनि गेजेराव सिएलखौ 15 साननिफ्राय बारायनानै 23 सान खालामनाय थांखिखौ नख 'र बिफानआ नेवसिगारबाय। नख 'र बिफानआ बेनि सोमोन्दै थासारिखौ गाहामै बानायना लाखिनो थाखाय बिथोन होयो। सिआरपिएफनि फार्सेनिफ्राय बे थांखिखौ बिफाननो दैथाय हरदोंमोन। बेनि फिन्नायाव बिफानआ बे थांखिनि सायाव सावरयनाय होन्नाने बुडो। नाथाय 7 थि पे कमिसननि आर'ज गावनायफोरखौ गनायथि होयैनि जाहोनाव बेनि सायाव बिफानआ गनायथि



होयाखौ। गासै रैखाथि मावसुमाफोरनो नख 'र बिफानआ बेनि खौरां होदों। 7 थि पे कमिसननि आर'ज गावनायाव बुंनय बादिब्ला,

छुट्टिफोरनि थिखानाय राहाफोर गाहामैनो सोलिगासिनो दड आरो बेयाव सोलायनायनि गोनांथि गैया। लोगोसे मिरुयारि एएसबिफोरखौ

सान्थिफोरनि दैदेननायनि सायाव छुट्टिनि सायाव सोंथि सोंनयनि सायाव बुडोदि, सिएपिएफ सिभिलियन फर्स दड आरो बिसोरनि

सिबिथायनि रादायफोरा रैखाथि हान्जाफोर एबा सान्थिफोरनिखुइ आलादा। बेनिखायनो सान्थि हान्जाफोरनि बिथिडव दिदोमै लाखिनांगौ। मख'नो गोनांदि, जवानफोरनो 100 सान छुट्टि, बिसोरनि न'नि खाथियाव पस्टिं जानाय, मोनसे थि बैसोनि उनाव डेपुटेसन गोनां जायगाफोरव दैथायहरनायजों लोब्बा गोनां थांखिफोरा गोजौ थाखोआव सावरयनायनि उनाव नुजाथिदोंमोन। बिसोरनि गेजेरजोंने सिएलखौ बारायनाय थांखिखौ दैथाय हरदोंमोन आरो माखासे गुबुन थांखिफोरा दासिमबो गोपलैसोनाने दड।

## क्रिस्टियान रनाल्ड गैयैयाव पर्तुगालआ वर्ल्ड काप क्वालिफायरनि मेचआव देरहाबाय

गोदान दिल्ली, 8 सेप्टेम्बर: स्टार फुटबल गेलेगिरि क्रिस्टियान रनाल्डआ मेचआव बाहागो लानो हायाखैब्लाबो पर्तुगालनि हान्जाया देरहादों। पर्तुगालनि हान्जाया बाकुआव जानाय वर्ल्डकाप क्वालिफायरनि बादायलायनायाव आजारखैजानखौ गाज्रियै फेजेन्तो हायो। टीमनि गोखों गेलेगिरि बर्नार्ड सिल्भा, आन्द्रे सिल्भा आरो डिएग जटया मोजाडै गेलेनानै दिन्थिफुनो हानायजों टीमआव रनाल्डनि बाहागोयारि जायैनि फार्स मोन्दांथिखौ बावगारहोनायजों टीमनि जानानै गल सोयो आरो पर्तुगालखौ देरहासार खालामो। विसोर साथामनि गरसेयै गल सोनायाव टीमआ आजारखैजाननि हेँथायै 3-0 गलनि फारागथियाव देरहानानै गुप-एनि थाखोआव



गिबिसिन जायगा आवग्रिनो डिएग जटानि मोजाडै गल सोनो हानायव टीमआ देरहानायखौ मोन्नो हायो। गुबुन क्वालिफायरनि मेचआव अस्ट्रेलियानि टीमआ

भियेटनामनि हेँथायै 1-0 गल आरो खोला करियाआ लेबाननखौ 1-0 गलनि फारागथियाव गिबियै फेजेन्तानै देरहादों। स्पेनि गोर्जो थाखोनि गेलेमु बिबानगिरिआ स्पेनिस् फुटबल लीग ला लीगानि गोनां खेबनै मेचखौ दोन्थ 'नो राजि जाबाय। जानो गोनां खेबनै मेचआ खोला आमेरिकानि हादरफोराव गावसोरनि हारिमायारि टीमजों गेलेनो थांनयाय टीमफोरनि गेलेगिरिफोरजों लोब्बा गोनांमोन। बासिलना आरो सेभियाजों लोगोसे बिलारियल आरो अलावेसनि गेजेराव जानो गोनां शनिवारनि मेचखौ गुबुन अक्टफोरनि गेजेराव खुंनया जासिगोन।

## अस्ट्रेलियानि बाग' स्पीनार शेन वार्नआ भिराट कहली आरो भारतयारि हान्जाखौ बाख्यायदों

लन्डन, 8 सेप्टेम्बर: अस्ट्रेलियानि बाग' स्पीनार शेन वार्नआ भिराट कहलीखौ आधिखालनि भारतयारि हान्जाजों मान होजादों। हान्जानिफ्राय मान होजानायनि जाउनावनो हान्जायाव बयबो बिथानि जानानै गेलेनो आरो बिथानिनो बिथोनजों सोलिनो हास्थायो होन्नानै बुडो। भिराट कहलीनि दैदेन्नाय हान्जाया इलेण्डनि सायाव 157 रनजों मोजाडै देरहासारनानै आधिखालाव सोलिनया 5 खेब मेचनि सिरिजआव 2-1 स्करनि फारागआव आवगायदों। भारतयारि बलारफोरा केनिंगटन अभालआव जानाय ब्रैथि टेस्टनि जोबथा सानआव मोजाडै गेलेन्नानै दिन्थिफुनो हादों। टीमनि जानानै जसप्रोट भुमराणि मोजाडै दिन्थिफुनायखौ नुनो




मोन्नायजों लोगोसे सार्दुल ठाकुरनि अल राउन्डार महैर दिन्थिफुनायाव हान्जानि गोहोखौ दिन्थिफुनायाव जाकु'सार

खालामदों। सिरिजनि जोबथा मेचआ फैगौ 10 सेप्टेम्बरनिफ्राय मन्चेस्टरनि अल्ड ट्राइफर्डआव

खुंफुंजागोन। बे सिरिजआ जोबथा थांखि लानाय मेच जानानै फैगोन। केंगारु लेजेन्ड शेन वार्नआ स्काइ क्रिकेटजों बयबो बिनि फार्से नोजोर होयो आरो बिथानि खौ बयबो गेलेगिरिफोरनो मान होयो। बियो बिसोरखौ मदद खालामो आरो बयबो बिथानि जानानै मेचआव बाहागो लायो। अभाल टेस्टनि जोबथा सानआव भिराट कहलीआ जसप्रोट भुमराणि गेजेरजों अलि पपखौ आउट खालामनो हानायनि उनाव बर्मि आर्मिखौ खुगा दामनानै लाजि फोनांदोंमोन।

## काश्मीरनिफ्राय कन्याकुमारीसिम साइकेल सालायना वर्ल्ड रेकर्ड खालामदों

गोदान दिल्ली, 8 सेप्टेम्बर: काश्मीरनि लाइमोन संघा आदिल तेलीया काश्मीरनिफ्राय कन्याकुमारीसिमनि 3,600 किल 'मिटर' जान्थायखौ 8 सानावनो साइकेलजों दावबायनानै वर्ल्ड रेकर्ड बानायदों। आदिलआ काश्मीरनि बडगाम जिल्लानि थागिबि। बियो 22 मार्चनि फुनि 7.30 रिगायाव श्रीनगरनि लाल चौकआव थानाय घन्टाघरनिफ्राय गावनि दावबायनायखौ जागायदोंमोन आरो 30 मार्चनि फुनि 9 रिगायाव कन्याकुमारीआव सफैदोंमोन। 23 बोसोर बैसोनि आदिल तेलीया काश्मीरनिफ्राय कन्याकुमारी साइकेलजों खम साननि गेजेरावनो दावबायनानै गिनिज बुक अफ वर्ल्ड रेकर्डआव गावनि मुंखौ थिसनो हादों। आदिलआ फोरमायनाय बादिल्ला, 22 मार्चआव गावनि साइकेलजों दावबायनायखौ जागायदोंमोन। नाथाय गाव फावसयाखै। मानानो गावनि थांखिया गोजाम



लादोंमोन। बियो रेकर्डखौ सिमफायनायमोन। एएनआइजों सावरायनायाव आदिलआ फोरमायदोंदि, गाव नरबालनि थागिरि आरो बैयावनो 10 थि थाखोसिमा सोलेंथाय लादों। मेट्रिकखौ उथिनारनि उनाव हाइ सेकेन्डारिखौ मागमआव आरो श्रीनगरनि गान्धी मेमरियेल कलेजनिफ्राय गेजुएट खालामदों। आधिखालाव गाव अमृतसरनि गुरु नानक देव इडनिभासिटियाव पस्ट गेजुएसनि सोलेंथाय लागसिनो।

## देबेन्द्र झझारिया, बेनकाटेश प्रसादजों लोगोसे माखासे बाग'

## गेलेगिरिफोरखौ माहारियारि गेलेमु बान्था सायख 'नाय कर्मिटाव सोफादों

गोदान दिल्ली, 8 सेप्टेम्बर: पेरालिम्पिकआव खेबथाम मेडेल देरहानाय जेभलिन गेलेगिरि देबेन्द्र झझारिया, बाग' क्रिकेटार बेनकाटेश प्रसाद आरो बाग' वर्ल्ड सेम्पियन बक्सर एल सरिता देबिखौ सोलिफु बोसोरनि माहारियारि गेलेमु बान्थानि सायख 'नाय कर्मिटाव सोफाबाय। आजिर लानाय सुप्रिम कर्टनि जास्टिस मुकुन्दकम शर्माया समिटिनि आफादगिरि जागोन। बाग' आसरीर अन्जलि भागवत आरो आइजो क्रिकेट टीमनि बाग' केप्टेन अन्जुम चप्राखौबो कर्मिटाव सोफाबाय। गेलेमु मावख 'निफ्राय बेनि सोमोन्दै



मिथिसार होबाय। झझारियाआ थांनया बावैसो सान सिगां जोबलानाय टकिय पेरालिम्पिकनि मेचआव सिलभार मेडेल देरहानो हानाय

साननि गेजेरावनो देरहागिरिफोरनि सायाव थांखि लागोन। सरकाआ अलिम्पिक आरो पेरालिम्पिक मोननैबो मेचआव दिन्थिफुनाय

गेलेगिरिफोरखौ गेजेराव जुथायै बान्था रानायनि थांखिजों सोलिफु बोसोरनि गेलेमु बान्था होनायाव फावसायनानै लाबदों। भारतनिफ्राय टकिय अलिम्पिकआव गं 7 आरो टकिय पेरालिम्पिकआव गं 19 मेडेल देरहाबोनो हादों। जेभलिन गेलेगिरि निरज चप्राया गल्ड मेडेल देरहानायजों भारतनिफ्राय गोग्गानाय लागों। बिथाडा मोजाडै गेलेनानै दिन्थिफुनायजों भारतनिफ्राय गल्ड मेडेल देरहानायनि रेकर्डखौ लाखिबाय। गेलेमु थाखोआव बर्यनिफुडो देरसिन बान्था होनाय राजिब गान्धी खेल रत्न बान्थानि मुंखौ सोलिफु बोसोरनिफ्राय सोलायनानै ध्यानचन्द खेल रत्न मुं होनाय जाबाय। गेलेगिरिफोरनो अर्जुन बान्थाबो होनाय जागोन।

## सेरेना उडिलियाम्सनि कच पेट्रिकआ कमेन्टेटर जानायजों लोगोसे माखासे कचफोरनिबो बिगोमा जादों



गोदान दिल्ली, 8 सेप्टेम्बर: सेरेना उडिलियाम्सआ इउएस अपेनआव बाहागोयारि जानो हायाखै, नाथाय बिथानि कच पेट्रिक मराटलुआ गासैबो जायगायाव मुं लाखिनो हादों। 51 बोसोर बैसोनि पेट्रिकआ गोबां गेलेगिरिफोरनि रुजुनायाव स्टार जानानै दड। दारि गोसोम-गुफुर कखाबनि दारिजों पारफेक्ट महरनि आरो

पार्सनेलिटीनि पेट्रिकखौ टेनिस कचनि सोलायै सासे फ्रेन्च फिलसफार बादि नुयो। बिथाडा गावनि सायाव दा कच मुनि गांसे बिजाबबो लिखाय। पेट्रिकआ 2012 निफ्रायनो सेरेनाखौ कचिं होबोगासिनो दड। गावखौ ब्रेन्डसिम महयाव लाबोनाय पेट्रिकआ कचिंनि थाखोआव गोबाडैनो आखाइ दड। बिथांहा फ्रान्सनि खोलायाव

मराटलु एकाडेमि दड। बेयाव बियो सा 200 निबो बांसिन टेनिस गेलेगिरिफोरखौ खाबु होयो, जेराव गेलेगिरिफोर बेयावनो थानानै स्कुलआव थाडो आरो टेनिसनि ट्रेनिंगो लायो। बिथाडा बोसोरफोमबो 4 रोजा गेलेगिरिफोरनि थाखाय गेलेगिरिफोरनि केम्प खुंफुडो। फैगौ बोसोराव बिथाडा इ-कचिंनि राहाबो

जागायगोन। प्रिकआव पेट्रिक बिथांहा नवारनि आरो दुबाइनि जुमेरायाव मराटलु मुनि टेनिस मिरु दड। सुबिदा आरो खाबु होनायनि थाखाय टेनिस मिडिया वेबसाइट बेखेवनायजों लोगोसे इएसपिएन आरो इउर 'स्पर्टसनि कमेन्टेटर बिबानआवबो दड। बिथांनाव उन्दैनिफ्रायनो सासे प्रफेसनेल गेलेगिरि जानायनि सिमां दडमोन। 16 बोसोर बैसोआव टेनिसखौ नागारनानै फरायनायाव गोसो होनाय पेट्रिकआ 20 बोसोर बैसोआव गावनि फिफाजों गावसिनिनो फ्रान्स उद्यग आरो रिनुएबल इनार्जि कम्पनीआव नांथाबदोंमोन। 26 बोसोर बैसोआव फिफानिफ्राय जानगारनानै बिथाडा फिन टेनिसनि मुलुगआव नांथाबदोंमोन। बिथाडा गिबियाव लाइमोन गेलेगिरिफोरनि एकाडेमिजों गावनि कचनि केरियारखौ जागायदोंमोन। 2012 आव सेरेनाजों सोमोन्दोआव फैनयाय बिथानि एकाडेमिआव सा 50 कचफोर हाबा मावो।

## 19 दाननि उनाव श्रीलंका हान्जाया गिबि खेब सानसेयारि सिरिज मेच देरहाबाय

कलम्ब', 8 सेप्टेम्बर: श्रीलंका टीमआ वन्डे सिरिजनि थामथि आरो जोबथा बादायलायनायाव खोला आफ्रिकाखौ 125 रनआव फेजेन्तो हानानै 19 दाननि उनाव गिबि वन्डे सिरिज देरहादों। श्रीलंका टीमआ गिबियै बेटि खालामनानै सा 9 उडकेट खोमाना 203 रन खालामनानयनि हेँथायै देरहानायनि थांखिजों ऑखारनाय खोला आफ्रिकानि टीमआ 30 अभारआव 125 रन लानो हानायजों 78 रननि फारागथियाव जेन्नो गोनां जायो। श्रीलंकानि जानानै डेब्यु खालामनया अफ स्पीनार महेश थिकसानाया गिबि बलावनो उडकेट खोमायो आरो टीमनिफ्राय 37 रन लानायसिमाव सा 4 उडकेट खोमायो। लेग स्पीनार भानिन्दु हसरंगाया 38 रन होनायजों सा 2 आरो दुम्भन्ता चमिराया 16 रन होनायजों सा 2 गेलेगिरिनि



उडकेट लानायाव जाफुंसारनो हादों। चमिराया श्रीलंका टीमनि जानानै 29 रन जथायनो हादों आरो बिथाडा मेन अफ दि मेच सायख 'जादों। श्रीलंका टीमनि जानानै चरिय असलनकाया 47 रन लानो हादों। खोला

आफ्रिकानि स्पीनारफोरा 40 अभारनि बल खुबैदोंमोन जाय थांनया रेकर्डनिफ्रायबो 7 अभार बांसिन। राननि थांखियाव ऑखारनाय खोला आफ्रिकानि टीमआ जागायजेन्नायाव गाज्रियै गेलेनानै दिन्थिफुनो।

टीमनिफ्राय 19 रनसिमाव सा 3 उडकेट खोमानानाय अस्ट्रेलिया टीमनिफ्राय हेनरिक क्लासेन (22) नि अनगायै रावबो गेलेगिरिफोरनो 20 रननि बांसिन रन लानो हायाखै।